

端溪先生集卷之五

門人汾陽孔天胤編次建業張蘊校刊

墓志銘

殤子衢郎壙志銘

衢郎之生也實弘治甲子八月也兄姊妹弟五人焉澶郎登科
蘭蕙貞姐而衢郎行居三以亞澶郎一歲又謂之二郎焉耳目
明秀神志以靈雖嬉戲終日而言默起坐矯矯有壯氣特異諸
兄弟妹蘭蕙病疹早沒未幾登科兒來京亦沒而衢郎之亡則
正德己巳閏九月十三日也臨絕聽其育間氣猶隱隱連呼予
者三而予方病卧昏瞶未有以應也其母段氏撫其尸而哭之

特哀甚已而成病冬十二月十八日亦淪胥以亡噫否也甚矣
尚何言哉意者豈天命乎抑亦人事之或然也天人之理微矣
然則柰何曰事至於此雖謂之不幸可也而其理固有不可知
者不可知則其謂之命與數也亦宜先是荆婦之亡也迫甚甫
及旬月旋復以車載其柩而還惟衢郎則柩留京師者凡五閱
月開州吾祖宗墳墓在焉安能落落又寄此乎乃卜日歸葬欲
其子毋得依附地下因復為銘銘之聊以紀歲月也亦以示夫
予之不忘也其銘曰吁嗟衢郎我心孔傷我心孔傷曷其有疆
悠悠蒼天謂之何哉吁嗟衢郎有柩南旋有柩南旋淚下如泉
悠悠蒼天謂之何哉

靖母王孺人墓志銘

正德歲壬申正月既望溧陽少尹靖公邊以其母王孺人行狀
踵予而問志銘聞之孺人孀居守志者幾四十年蓋貞節人也
何可無言以傳諸後按孺人姓王氏大名府大名縣美化里人
也隱君子王公能長女母薛氏治家甚嚴孺人年十七適邑庠
生靖公世芳靖氏家世業儒為郡邑望族孺人之歸靖氏也孝
恭柔婉父之益著鄉人親戚無論近遠咸知其有隱德成化癸
巳歲大水會世芳溺水死孺人春秋才二十有一也哭之哀甚
氣為頓絕不食者累日未幾亦赴水求死鄉人覺旋復救之孺
人曰吾求死不得乃更使得生耶辭色俱慘見者悼之母薛氏

恐其終未釋也特謂之曰汝之意則善矣如世芳之後何且夫死從子古之訓也爾柰何違之孺人收淚許諾然以夫亡子幼往往感激淚至喪明其平居也則惓惓訓飭其子俾之向學至躬親織紡以供日用既而邊果為郡庠弟子自卒業太學正德辛未夏四月司銓衡者以為應天府溧陽簿旋迎孺人之宦邸會燕設孺人舉酒不能飲曰汝以讀書幸沾一命惜不令汝父見之言與淚俱下滿坐為之掩泣既而成病卒焉時正德辛未夏六月二十九日也享年六十有七子男一即溧陽簿邊也女一適郡陰陽正術張蠻孫男二長四兒季五聖保孫女一許聘郡人張淮子某嗚呼以王氏之清節凜然始終無間其天性之美有足多者而其子孫之賢且淑者方未艾也則天之所以畀益之者豈偶然哉人之言曰天道福善而禍淫蓋自是益為信然矣復銘之銘曰毓之者貞守之者剛積之者厚發之者昌惟風之清泉石之光

處士侯公墓志銘

公諱疆字禹服號滄洲釣隱世為開州之清河里人也祖春登永樂辛丑曾鶴齡榜進士為御史仕終浙江副使以直名動天下父佐讀書不樂仕叔英為都御史母蕭氏有淑德公之生也兄姊妹弟兄七人而公行四恬退自怡曠如也弟天性業儒有英氣以豪曠高邁自許尋以疾廢業人皆惜之長姊適少尹郭

君忠次適郡人張處士欽次適陳少尹璋次適先公刺史府君次適義門鄭氏漢公性資踈通明爽善論事雅有高致有通達天下之才而不顯其光有廓然一視之量而不以壽考永年有高潔不拔之操而不以一事見表有善處機務時宜之智而不獲小有所試命實為之夫君子之於天下求其無愧而不責其窮與通守其在我而不問其在人與物凡以不悖於道而已若乃公之家世清白為名御史後其閨壺則肅而雍也其用度則儉而素也其教子治家則端而勤也其延賓處鄰則睦而和也其事先禮神則誠而孝也其恤孤賑窮則慈而惠也每燕暇披襟坐月明中則歷歷論說古今人物洒然可聽俾親戚後進凡

讀書力學之士知所據依而其汲引懇到之心實有未易名言者不肖與表兄嘉猷早同筆硯沾被獨深曾幾何時而公乃以疾不起耶公有孝友之德推而見之行事井井有條而樂易好施不與物競所至不問賢愚望之者即知其為達人長者君子以為古之善人非歟公生於某年月日卒於正德元年七月某日享年五十有三子男一即嘉猷明秀有遠器女一早卒娶王氏郡名醫王先生季女有賢德尤善治家先是正德二年二月二十有八日葬公祖塋之東北岡今去公卒時忽忽垂十年餘間或過其居拜其靈周視其平生器用花木草石宛然整好猶前日而表兄之志業文章則亦過往年多矣為之感嘆懷慕繼

之以悲九原竟不可即而一慰愚私也則亦將何日忘耶為之
銘銘曰吁嗟公兮惟誰之子矯矯茂族直哉若矢吁嗟公兮允
矣哲人古今一脉誰為屈伸吁嗟公兮多福自受克昌其家以
垂其後

郭君鎮邦配孺人朱氏合葬墓志銘

君諱維垣字鎮邦開州東郭里人也其先河南上蔡人曾祖賢
始徙居開州云祖禎娶張氏生縉縉生君兄維藩舉成化甲午
鄉試第六博古振俗至今猶有能言之者君生而慷慨天性仁
孝少事祖母曲盡心力友於兄尤善處鄉里恤孤幼重有德耻
言功利奮然有尚友古人之志弘治戊申補郡庠增廣員鄉人

莫不拭目以望未幾居父喪毀哀骨立旋復卒實弘治庚戌三
月初十日據其生則天順甲戌正月初二日也享年僅三十有
七配孺人朱氏濮州朱公道隆孫女也賢且慧知孝經列女傳
大旨歸郭氏凡十五年内無間言人亦以為郭氏之良配云當
君之亡也二子璘玠俱幼璘少長於玠兄弟十五六時刻苦力
學動希往哲玠舉正德庚午鄉試九十三璘補郡庠廩膳生癸
酉入鄉試未遂以還而凌雲之氣固在也鄉人稱其兄弟之齊
名者咸以為朱氏之善教云夫以朱氏既能善教其子而復誓
志栢舟垂老苦節有如一曰可不謂難乎孺人生於天順乙亥
十二月十有六日卒於正德戊寅春正月二十七日享年六十

有四子男二長即璘次玠女一歸東明縣黃子時佐男孫五九
峯九臯九翀璘出九遷玠出女孫一許聘楊魁子梅璘出乃今
年某月某日將合葬城東祖塋之次鄉人莫不以為君之夫婦
子孫多賢可無復遺恨也已予幼與璘兄弟同筆硯知君家世
為悉乃述其世系行事如前復銘於後銘曰生之清行之貞嗟
乎孺人也女之英豐其才遯其名嗟乎鎮邦也人之雄蕃乃嗣
昌乃宗嗟乎君之夫婦也沒之寧

登兒遇雨志銘

登兒者端溪王子之三郎也自繼室谷氏沒始與予同榻焉距
今凡六歲性通靈能孝敬儀狀美白端好酷類其母每食未嘗

不在側或予公署未退家人促之食以予未來不敢先及予來
則曳衣而迎之或予出囑予之早來也即隨出門隙窺之及乃
去辛巳冬隨予西江宦邸癸未春其母卒先二日抱哭久之冀
其成立而悼其永訣也夫亦安知其復沒也悲哉往還見舟人
歌即一一能學二郎田者口授以三字經即隨口朗誦如素嘗
知者其致人不能忘情大段如此乃甲申夏六月二十三日病
痘以死予哭之過目為腫時方中伏予心謂天必雨庶兒屍之
不壞乎是夕陰明日天果雨無暑殮事始畢嗚呼登兒可不謂
幸乎可不謂幸乎雖然雨不以是而兒實遇之矣據其生實正
德己卯七月二十五日也繼之以銘銘曰昔何生今何死數有

終必有始嗟爾歸其寧止

明故孺人來氏合葬處士劉公墓志銘

孺人姓來氏處士劉公允之配也公允字公信蚤業儒矯矯有大志嘗喟然嘆曰人生不可無聞於當世故其肆力於問學者無間寒暑而鄉之後進多賴公陶成者劉氏先為山東之觀城人父諱福者國初始徙居大名因遂占籍云公自娶孺人交相懽好雍雍如也怡怡如也少長親舊無間言者至於舅姑之養會年荒至采薇蕨以進蓋其時之遭孝之著類如此君子曰可以觀孺人之賢也矣先是公年十五六時有弟五人元克克光孺人撫之各有攸當乃既長則勸公擇配俾咸有成立未幾弟

婦紛然咸欲異爨公以問諸內孺人曰不可夫家國之範也兄弟情之鍾也孝弟德之順也從而異之無乃不終乎繼而言者如初竟莫能止於是公始以生產均之然心實未嘗悅焉君子曰可以觀孺人之相夫也矣孺人性貞而慈心慧而辯質朴而婉童僕子女有過者多釋之不忍撻曰此亦人子也姑教之而已其巨細之行大抵類此正德己亥七月九日公先孺人卒享年五十有九孺人當公之大漸也以後事問公但曰教夫三子者然起吾家繼吾志者必三子也此外亦非乃所知孺人收淚曰諾蓋自是始躬為治家課子計焉初公生三子俱力學有父風乃嘉靖壬午容甫果領順天鄉薦明年癸未復登進士第旋

宰鄞縣且迎孺人於宦邸孺人每謂容甫曰省刑恤孤脩德禮
賢防奸課農爾之職也容甫拜受曰敢不如命故容甫有聲於
吳越為諸郡縣稱首孺人之教也君子曰可以觀孺人之教子
也矣乙酉秋孺人始北歸歸之三歲曰戊子春三月十有八日
卒矣實享年七十有一云子男三長宗仁選擢內臺娶郭氏次
宗禮娶崔氏次宗智娶苗氏俱邑廩膳員男孫三芝蘭若女孫
六長適庠生趙思仁子淮次聘李大經子獻可餘在室容甫將
以是年閏十月十有六日合葬處士公於邑之東北祖塋乃謀
父鄉進士厥親徐一之狀來乞志銘乃銘曰母之慧克振其配
吁嗟母兮母之婉流慶其緩吁嗟母兮母之良垂聲其長吁嗟

母兮

明國子監丞貞菴郭君墓志銘

嗚呼貞菴其真已矣夫吾猶及爾之永訣也不可
知者其天歟不可易者其命歟嗚呼貞菴其真已矣夫非予為銘為志其復
誰據門人封子國狀君諱玠字信卿貞菴其別號也其先河南
上蔡人高祖賢國初徙居於開今遂為開州人賢為郡典術娶
安氏李氏生六子其季則曾祖諱禎也禎娶張氏生二子君祖
行二諱縉字大紳天順甲申例貢授鞏昌府通判六年有惠政
丁內艱還以疾卒於陝州娶姚氏子男二長維藩少有大志以
詩經薦成化甲午鄉試魁未仕卒次維垣貞菴考也增廣生與

兄維藩齊名於時得年三十有七而卒娶朱氏濮陽後府經歷道隆女貞菴妣也通孝經女戒大旨年六十四卒子男二長璘文卿娶甘氏子六人九峯九皐九翀九苞九寰九棘次即貞菴少倜儻有英氣與人交明快無隱伏其所為文浩博縱橫雖老師宿儒自以為弗如也自後從鄉先生甘養盛遊因益肆力於經書子史甘公每謂所親曰郭氏子其有成乎弘治辛酉貞菴與文卿俱補郡庠弟子員正德庚午則舉順天鄉試然而屢敗南宮人稱屈焉其平居尤好汲引後進如封子類甚衆皆卓有進益嘉靖甲申授太原判府比視政當路諸公莫不嘉之未幾逋負告完夙弊日清晉人亦允服矣至其斷聽獄訟精敏條達

吏胥皆不敢干以私雖老吏莫之及云定襄縣一日失印貞菴至教以求無太急急則投諸水火矣縣官從之未幾輒復獲印御史馬公百愚委以清查平陽府庫復委捕盜苛嵐諸郡縣俱得勵獎為三晉別駕稱首未幾復有事於苛嵐一日山行冒嵐氣成疾思飲澗泉輒飲之已而疾益甚遂至語澁手足痿痺焉乃忽嘆曰何以宦為因乞休已而人有勸其不可者乃辭原任遂授東昌府學教授條規井井生徒雲集出其門者戊子己丑擢科之士凡三人論者以為貞菴恬退自牧有古之遺風而所用未足以展其蘊咸復惜之己丑夏四月擢國子監丞鄉之父老豪傑皆鼓掌曰是公論之大明也貞菴宦業其光乎乃抵里

之三日親黨會晤未幾前疾大作迎醫自治莫效也是年五月二十一日卒於正寢嗚呼其可痛也已矣君生於成化壬寅四月十二日享年四十有八娶王氏郡人司訓世寶之女再娶陶氏東明隱君贊之女子男三九遷則子之坦腹子也次九達聘太學生孫冠世女次九迪聘南康守王公濟女女二長聘太學生馬宗湯之子應奎次在襁褓九遷等卜以是年七月十六日祔葬城東南隅祖塋之次以予眷屬因遂托志銘焉遂述其大槩如此銘曰否其泰嗇其豐吁嗟乎其命不同秘其光深其藏吁嗟乎其德不忘

南野孫公墓志銘

公姓孫氏諱經字引之南野其別號也其先山東鉅野人至敬先處士始徙吾開曾大父福大父昇俱不仕父釗性仁厚鄉鄰有橫侮者輒閉門不與之校贈承德郎吏部主事公生而美姿容脩髯如畫論談英發五七歲時即能為竒對當時名士多器重之年十有四遊郡庠博通經史下筆滔滔未嘗屬草而聲華日播黌宮間矣弘治戊午池陽李公守開每見必曰此公輔器也乃辛酉歲公年二十有五遂領鄉薦第十三弟綸方九歲公嘗撫而泣曰吾兄弟不幸早失所天今母氏孀居家業索然苟不奮發以圖進取先君目且不瞑矣於是教以舉子業夜以繼日綸正德丁卯亦領鄉薦鄉人每評人物至公則曰此孝友人

也何可當何可當公事劉氏太安人尤謹嫡母沈孺人所出二兄曰綱曰紀太安人少有怒必跪而請曰寧責吾二人無責吾二兄也由是太安人亦感悟視綱紀益厚正德戊辰年三十有二登呂柟榜二甲進士觀都察院政改戶部主事未幾天官聞其賢復改吏部稽勲主事遂菴揚公每論事必深為許可然性直方剛大不能為委曲軟熟奏績之年遂僉事三晉尋兵備雲中路城王驕橫諸司莫敢誰何公一切裁之以法由是雲中軍民稱慶矣有僧清洞者累年動越禮法公卒得其罪狀而按之比任滿歸父老諸王多餞留城下至日午不能行其後分巡冀寧與監察御史杜公昌會決要囚多所平反正德十年太安人

以疾卒訃至公哀慟踰度既免喪除補陝西叅議蘭州金孫會年荒公為具奏蠲其賦稅邊人賴焉秦都司指揮孫昌田祿搔擾軍士公按而劾之由是軍中有更生之謠矣隴西巡茶御史王公欲改水入城力止之不聽後果溺死者幾三十人由是巡茶亦以公為先見云其作事動合事機大率類此無何陞本省按察副使兵備環慶有聖主深恩渾未報小臣竊祿敢偷閑之句總制中丞李公鉞一日至慶陽見其旗幟號令精采十倍即喟然嘆曰英雄才也巡按御史曹公珪凡稱服之者多與李同先是邠州除一妖女擇配以夫邪說始息商人熊飛輩凡百十有二人以種鹽勘問事誣謗及公未幾事白諸商曰當時孫使

君用我輩糧草今日乃謂若是耶天平寃哉嘉靖六年春大饑
因出粟以濟貧民不能食者無慮數百人公平生雅好賓客樂
道人善為詩文渾雄俊健有遺稿存於家至其光明磊落見事
風生雖一時豪俊自以為弗若也事嫂屈氏年踰七旬禮尤不
廢其他可以類見云處其生成化丁酉十一月十七日卒於嘉
靖己丑三月二十一日享年五十有三娶侯氏郡處士國之女
賢稱里黨子男二長如筠俊才有大志次如徭亦好學不置女
一出側室王氏孫男某某孫女一許聘中丞李公廷重之孫份
嗚呼以公之才華如是問學如是人品如是從而置之廟堂以
究厥施固亦分內事也而竟以疾不起耶予與公同年且眷屬
潤身嗚呼是為南野之墓以示其後人

叔祖處士王公瑛墓志銘

嗚呼此我叔祖也聞之先人曰公名瑛字廷輝兄廷瑞我祖父
祐我曾祖祖浩我曾高祖曾祖彬我始祖也娶李氏無嗣嘗瘞
城中興國寺今改葬城東堤下有二柳焉公嘗業儒為府庠生
美容儀工書畫然多不拘小節卒以無成終焉故老惜之慶既
錄諸譜復立石用示後人嗚呼人之所恃以不朽有不專夫石
者然而盡吾心而已矣銘曰有墓有墓處士在此我田附廓百
畝而止嗚呼叔祖視爾孫子

明故虎山李先生墓志銘

虎山李先生諱麒字世祥別號虎山世居開州之張郭里乃嘉靖壬辰秋八月十七日卒焉既閱月先生高弟吉君萬言乃以狀托予為志銘以傳顧辭官來頗不事文藝然以先生行義之高知愛之素義固不可辭也乃援筆作志以示其後人志曰先生之父能以力善起家不激詭不抑抗朴而不陋儉而不嗇使聞之者洋洋乎勸信哉其有後與母邸氏柔而婉慈而貞清豐元丞相之裔也大父寔曾大父敬皆有隱德為鄉里推重先生娶宗氏繼娶王氏子男二伯樸宗出仲桐王出女四長歸肥城令唐君之子祚次歸寧海守程君之子萬石次歸延長令王君

之子世官次歸訓述紀君之子樾男孫三九功九叙樸出長女歸王圻次歸程燦次懋德桐出長女歸高惟善次聘鍾若蘭曾孫二樵夫漁夫曾孫女三在室先生常痛亡兄之早歿而撫其遺孤甚至又嘗念姪玠未之能立而造育其子又嘗謂兄弟之鮮而敬愛其姊若同時郡人李先生鳳儀高先生汝翼則又相與友善油油然終始未之間也先生生而雅重敦厚幼有大志讀書力行慨然有追逐古人之意性尤不喜浮華重廉讓不輕許諾乃成化丙午舉於鄉弘治丙戌授同知晉之澤州其蒞官猶處家也甲子既免喪再同知東昌之高唐其蒞高唐猶澤也正德庚午以當路劾薦旋擢守高唐焉即其郤魚丘驛張雄之

金以代民租斷舊庫役之獄使稱神君平軍人吳成之訟使其舅免中毒以死此其政事之尤著者先是中使臨高唐他郡邑望風奔走恐後而先生不屈辱於趨承乃辛未大盜群起高唐城陷不能支而先生每以不得死其事為恨高唐人至今談之不衰然竟以是歸歸之日足跡絕不履州府此則始終之大較也先生生於景泰癸酉夏四月二十九日據其卒則已八十春秋於茲矣乃卜是年冬十一月十有六日葬道原之岡嗚呼先生既以德著復以壽終而其子姓之賢方與未艾古所謂鄉先生歿而可祀其殆有之矣因復為銘銘曰鍾其仁不乏其派古之遺愛兮蒞其官不敗其廉古之遺賢兮守其身不失其亢

古之遺諒兮

明故張孺人合葬孫公墓志銘

志曰處士公姓孫氏名某字某其先秦之西安朝邑人六世祖嘗為大元提領史失其名無傳焉娶梁氏生長卿長卿生禪謀禪謀生大大生溫溫生綉綉生公皆弗樂進取公兄弟二人長曰廣仲即公娶同里處之女即孺人云孺人之歸公也德充於容行踐於言高朗而不傷其柔嚴恪而不害其和君子以為婦行之要矣比公携貲抵徽陽曰此樂土也因而卜居遂為徽人焉成化甲辰歲且大凶公因與孺人設饘粥濟之多全活者君子以為相夫而能推其惠其婦道之大端乎越七年公卒孺人

哭之痛繼而以死自誓垂四十年人無非間其後有司過廬而嘉其節將表於朝孺人輒命其子止之曰吾不能以死從而父徒以爾之未立故也乃復重吾罪耶不可不可聞者感焉君子以為知謙知守得婦道之正者也尤善撫諸孫以慈愛而子魚在諸孫則鍾愛尤篤先是子魚嘗尹洪洞寔迎孺人於宦邸孺人乃進子魚而教之曰爾惟克脩令德以光前人其益敦乃事無累乃志苟能是吾復何恨今子魚每追論之輒復嗚咽不自禁君子謂孺人憂能及公至是尤婦德之不可及云及其疾也家人迎醫子孫環請竟不之聽越再宿卒於正寢實嘉靖十年三月八日也君子以為婦人知命者嗚呼是不可觀孺人矣

乎攬處士生於正統十一年十月初四日卒於弘治庚戌五月十八日享年四十有五孺人生於正統十四年四月十七日得年凡八十有三子一即珂樂善克家娶趙氏女三長蚤世次歸同郡王銘次歸楊武孫男四皆珂出長巨鯤次巨鯨即子魚少以後才聞未幾以春秋登癸未進士先宰洪洞繼守吾開皆有惠政次巨鯉業商次巨鰲充郡庠弟子員女孫四長歸商人石瑛次歸生員袁世經次歸商人傅經次歸生員梁藩曾孫六光祖光前光裕巨鯤出光庭光世光道巨鯨出光祖充郡庠弟子員曾孫女四在室子魚承父命采石黎陽將載歸為祔葬計顧濫托予文冀不朽焉其孝乎親者篤矣何可無銘銘曰貞其德

顯其光振其後伸其良祔其室永其藏

左隱君大噐墓志銘

嘉靖甲午春二月十有四日清豐左清甫厥考大噐君卒清甫
哀哭而成病乃使厥姪無咎來請銘因遂據狀而為志按君諱
昂其先館陶人世居邑之武強鎮曾祖欽會元末亂離獨守先
業惟謹祖習欽之季子也嘗為府庠弟子員永樂宣德間將卒
業成均而未果識者惜之父鳳勤於理身而果於蹈善鄉黨稱
耆老焉配秦氏君之母也君生而性行質實野居自適不履城
市雖未事詩書然動合矩度能急人之難兄旻鉞弟昱後先業
儒然皆酗酒以逞君性不樂飲每切戒之而諸兄弟則群共笑

以為迂君亦怡然不以介諸懷人以為善處兄弟之間矣君嘗
立祠以祀祖曰朱氏家禮可師也又嘗擇族之長而賢者立會
省墓遂以為例曰呂氏鄉約亦可推也故人以為善用古禮而
不受變於俗云初君之異居也得田僅二百畝有李雲者嘗餽
白金五十將為君廣業君乃毅然辭曰我竭力畊田足以自養
我何以子之金為哉又嘗卻子壻閻梅氏白金三十猶李雲也
人以為善守已而不苟於趨利弘治辛酉邑長陸君崑聞而嘉
之使理霍氏兄弟之訟卒得平允今霍氏子感而誦之固未艾
也正德辛未群盜流劫將官卻某神某相繼出師邑當駐馬之
路縣官苦於應給民皆蔽匿其馬君獨慨然出廐馬數十於軍

前以助不逮曰以是勤王之師不猶愈於盜劫矣乎人又以為處變而能知義由是大噐之賢益著矣自後邑令賈某汪某累舉鄉飲皆弗赴乃 今上龍飛以齡年應 詔得授冠帶為壽官居無何痰陡作而歿據其生景泰六年四月二十四日享年八十云配呂氏慈而內助子男二長即淮清甫國子生敦行而明志有遠噐仲則江周府典膳女三長歸閻梅次歸魏寵次歸孔輔男孫四無難無屯淮出無咎無違江出女孫曰娟許聘楊氏天麟之子曰韓次歸張嘉會次曰慎言許朱氏次曰謹言在室清甫以是年三月三日葬君於祖兆且以未及祿養為恨清甫可謂孝矣銘曰畊爾田不失爾廩蔽爾德不折爾年昌爾後

不朽爾賢

柳西馬君墓志銘

馬君成度卒之二年將卜葬厥壻張子訐以其內子鄧孺人之命為狀托予志銘以傳君郡人也名宗轅字成度家郡郭之西世種柳因號柳西曾祖玉祖秉皆未仕秉生騰字致遠是為君父號萬柳庄主人嘗丞登州之萊陽民稱惠政君行六幼聰慧逮長柳庄翁謂可以儒階身昌厥世乃令就鄉校從里師尋補郡庠弟子員然屢敗場屋未幾以 恩例入太學奉母谷孺人孀居年八十時入膝下煦煦乎猶襁抱也兄弟怡怡惟君以季弟見敬憚故鄉人謂君朴而不華質而不俚溫而不亢得其性

行之大畧矣君平生善與人交每親舊宴飲雅歌投壺喜動眉
宇酒未及酣往往出肺肝語故人亦傾心愛服尤樂稱人善未
嘗輕信流言以易其志故人亦始終思之此又君之心行不可
泯者也君嘗遭田土構訟雖諸伯兄群子姪竟未嘗失和好比
其卧病其兄四老往省乃相與抱頸而哭見者動容此又君之
愛友出於天而不可奪者也君賙貧不吝聞人患難如恐弗及
嘗有范文正公之志以敦三族而竟未之遂也豈亦命耶君生
於成化五年十月二十九日卒於嘉靖十一年七月二十四日
得年僅六十有四娶鄧氏家政井井克稱內助子男一永弼柔
恭嗜學先六年卒女六長歸張推府之子岍廩膳生次歸王縣
令之子世祿次歸王副郎之子世正次歸渭南令劉司直之子
愚次歸張司訓鵬之子一誠次歸庠生王詒男孫一出死有祖
父風卜以是年三月二十九日葬君祖塋附以銘銘曰誰謂成
度已死夫其良心孔彰是謂不亡誰謂成度未仕夫其良貴未
伐是為已達

明延安府通判張君墓志銘

擬鄉進士孫元龍狀君開人也姓張氏諱誥字汝欽慎齋其號
云曾大父忠國初以茂才聞歷官少司馬於南部大父貴父佐
少有氣槩早失怙能自樹立以弘先業 憲廟時歲大荒以發
粟活衆例與冠帶君子以為不私其有云 武廟辛未以子貴

始贈文林郎兵馬副指揮此則君之家世之大較也君生而豐貌長軀雙眸甚細坦易質實與物無競髫年鄉先生廉訪程公鑑見而噐之詢其姓氏扣其蘊畜乃鼓掌而喜曰是名家物也因遂以女歸焉及長以周易補郡庠弟子員識者讀其文字謂其辭不詭於理且類其人未幾以例入國學恂恂焉初未嘗有矜大色而同時與遊之士亦以為名家子云方君之處諸弟也友愛甚至夔析之日財物未嘗幾微見顏色諸弟自以為兄弟之好郡中所未有也正德庚午入選銓部天官以為西城兵馬副指揮時逆瑾雖誅宦寺猶熾每以事囑而君乃從容應酬動中幾會不可其請而亦不忤其意至是君子又以為君之善處

云先是御史孫君樂之巡西城也每見所交曰不以卑官而沮不以強禦而奪職西城張兵馬也其見重當道有如此在職凡八年司勳上其年勞君封授如前職內人程氏得封孺人尋陞陝西之延安判理糧芻於神木神木今秦之邊境邑也烽火日警戍客諸兵餽餉無恒人皆以為未易區處調度而君一以常規操縱其間各有攸當由是邊兵無告乏焉巡撫中丞姚公謨聞其賢仍移文獎之為撫屬最焉君嘗署縣事會孔廟屋壞莫有脩者且土俗酷尚師巫甚而入瀆孔庭猶夫淫祠君一日見而惻然遂命捕其巫而正之以法尋命工葺其廟貌如故閱月而工告完神木人士至於今談之不衰惟時巡按御史喻君

茂堅謀及中丞姚公其將同薦於上而君以疾歸矣實嘉靖之改元也君既歸杜門自愛足跡未嘗一及公府每呼諸郎而戒曰吾少有志當世而不克恢弘其業以繼美烈祖命也汝曹勗哉汝曹念哉日以唐詩諸史自娛然性不喜飲至優賓則陪語鎮日無惰容申申如也乙未冬遘疾卧榻上親朋往問者殆無虛日君雖疾中猶歷能談往事洒洒可聽蓋其知命自適不顧乎外類如此乃是歲冬十一月二十有一日卒矣卒之日鄉之老少無間遠近多哀之君生於成化乙酉十一月初六日據其卒蓋享年七十有一云子男四鳴鶴鳴鸞鳴鳳鳴鳩鶴鳩俱州庠生有大志鸞鳳善克家女三長歸梁舉男天祐其二殤歿

孫男七心學心印心正心德心師心安心法女孫十二鶴女五長歸生員王重芳次歸劉應旃男某次歸王君慎男某鸞女二一歸王克一男方凝鳳女四長聘李誼男某次聘梁宗祿男某次聘馬尚友男某鳩女一聘監生孫仲龍男大鵬餘在室鳴鶴率其弟將以是年丙申冬十月某日葬君城南西岡祖塋之次乃使其弟鳩來乞志銘因念君先大夫之故人也其世講焉既序其事如志復為銘之銘曰屯其膏兮未光究其用兮小康紹其祖兮用彰豐其後兮無疆歸其室兮永歲問其名兮常芳

勅封戶部主事樂菴劉公墓志銘

公姓劉氏諱遷字從善樂菴其號也世為元城解家里人曾祖

節祖有源俱不仕父增娶常氏實生公兄英為驛丞庶母二李氏生子三曰忠恕環石氏生子四曰淵邑庠生曰澶溥湧義官兄弟凡九公實行四娶河東里耆民張理女為室公貌偉而氣剛才達而質直雖未肆力於儒而識見道理甚早母常氏有綠衣之變輒流涕以諫為得罪於父遂令別居為授田百畝此外一毫無所與公處之畧其怨諸兄弟以為難自是服勤農事兼事商賈父之生業漸裕父由是始若憐其賢而悔其逐之過也公益自慎竭力以孝比及父母歿毀哀咸過禮宗族稱孝焉公年垂四十尚未子因數年飄乎無意人間事矣逮既生今主事貴卿君公始翻然滌慮為永圖云是故其居家則以勤儉其處

鄉則以和謙至若寬以容犯義以濟貧正以息爭平以交鬪則又邑人之所素仰而服也公好馳馬有良馬死輒令童僕埋之曰吾不忍乘其生而食其肉也至是人又謂其德之及物可與仲尼埋畜狗同科云貴卿甫七歲公即為延師於家塾以教為之正其句讀習其揖讓進退曰敦蒙也比及十二則又令之小灘鎮從師講業曰振而進也未幾又令從府庠張君溱遊曰學無常師以從善也乃 孝廟十四年始入邑庠為弟子員公由此遂亦見知於邑令舉鄉飲大賓 武廟丙子貴卿中鄉試親朋踵而賀者無虛日公笑曰吾嘗憂無子也乃今日有子至是耶嘉靖二年有農婦與隣婦毆隣婦投井死農婦將自縊以解

其慘因置其幼子於地大哭公聞而往救之遂以粟百斗給隣人死者葬而更娶事乃寢此又公活人之德而鄉所稔知者也已丑貴卿登進士試民曹政乃迎公夫婦於京邸無何張孺人以疾終是歲夏四月二十六日也享年八十有二公哭之哀貴卿免喪後公復速之北上已而且拜主事於本部明年癸巳有清泉之委則又迎公於宦邸會 恩封授職如子官母追贈安人一日盛宴公喜謂貴卿曰汝讀書我未也乃亦為是官耶又明年甲午送公歸有太倉之命凡五月而公訃至矣據其生景泰三年九月十一日其卒嘉靖十三年十一月初五日也享年八十有三君子以公夫婦俱登壽考為善有徵矣子男二長瑜

主事即貴卿敦篤而孝鄉評重之娶傅氏封安人次璣府庠廩膳生以好學聞娶白氏女四長歸邑人李輅次歸王爾次歸館陶溫良次歸庠生趙光繼孫男七夢華國子生娶董氏夢巖娶蘇氏夢龍邑庠生早歿夢颺夢澤夢芳俱幼皆瑜出曰耀德為國子生娶董氏璣出也女孫七出於瑜者一歸國子生曹浴出於璣者六長歸郝喟次歸李景明次歸王楫次歸董用威餘在室曾孫男三汝建夢華出汝登得祿夢巖出曾孫女二耀德出也貴卿將以是年丙申冬十二月三日合葬公及安人於府城北齊固村西南祖塋之次乃命其子夢華來乞志銘既述其行又從而銘之銘曰誰謂爾無子郎稱鳳毛誰謂爾弗遇官封地

曹爾名永兮奕世不磨爾族昌兮千百其多

明國子生盧君敬軒墓志銘

君諱鎰字畏之號敬軒其先晉之潞城人也始祖萬有隱德高祖士原國初由晉徙東明今遂為東明人云當士原之起家也會大河為患生理鮮少於是力農克儉家漸用康曾祖榮又從而克繼其後至是附籍開州為編戶長未幾分里旋復歸東明焉君之考旺字時興及其內人夏氏相與勤苦至躬操井臼日盛一日人以為君父不失教子君母不失相夫蓋其素重輿評如此時興正德甲戌秋八月卒享年八十又六夏孺人先公卒享年則七十又三也君生而質朴不事矯飾幼讀書領畧大務信義每開心見志行無隱僻親友朋舊之間油油然至忘爾我里黨至今稱之成化間以恩例入國學然竟不急於仕人又以為安常守素無慕外取榮之意蓋庶幾古之逸人云先娶薛氏鄉貢士原吉之女再娶劉氏賢而婉蓋名族女也子男四伯子清幼喪明娶某氏先君卒仲子淞娶李氏曹縣大尹某女叔子沼娶谷氏吾開谷少尹禹民女季子滂方從事業儒聘予小弱息云女三長采繁歸曹州廷尉王公子監生一麟次采蘋歸邑人蕭上舍子大淵次采藻歸懷慶衛舍餘繆氏子從仁男孫二曰桂曰根俱未娶清出也女孫一含粹淞出也君生於成化元年九月初十日其卒則嘉靖十八年四月初十日也享年

化元年九月初十日其卒則嘉靖十八年四月初十日也享年

凡七十又五云君之仲子淞以狀來乞志銘因復銘之銘曰惟君業素養高草堂白雲流水其樂洋洋日月幾何忽復奄棄君抱隱德庶幾信義天錫子姓如鳳如麟年當垂老見知縉紳歸爾佳城何千萬載俾爾來人無斃無改

明太原令月泉劉君墓志銘

君諱玳字文伯別號月泉世為開州人曾祖矩登永樂辛丑進士及第拜翰林脩撰博古而雅有長者風開先進之最著者矩生鈍字宗魯丞興化有德政鈍生淇字天潢遊郡庠有才俊聲配棗林王氏是生月泉者也月泉幼而慧敏從鄉大夫王東谷遊綽有辭藻然讀其文探其蘊鮮不嘆而服者後文宗浚川王

公校士至開以為畿內不可多得蓋月泉之名自是出矣乃正德己卯領鄉薦第三十九識者因以浚川為知人又以月泉為不負所知云是可以觀家學之淵源矣顧屢挫南宮遂以母老就太原令比過里謁墓感今思昔至流涕泫然曰惜不令吾父見也因迎母氏至宦邸養焉曰吾聊以慰吾私也是時太原邑政久墜民且頑嘗舉訟聞月泉至而撫之治之一以平易慈祥為主而間或濟之以刑董之以威曰吾不忍其習於頑而安於陋也未幾政教興而當路有聞於是分守蔣公移文委之清查朔代諸郡錢穀無不快人意者由是獎檄屢望於道矣月泉心慎而不狃於術學篤而不惑於異志剛而不怵於勢竟以巨室

搆毀敗官以歸識者又未嘗不惜其才之未盡展也歸之日方思結廬林壑訂盟詩酒肆力農畊以終乎其身未幾疾作而卒實巳亥冬十月十八日也悲夫月泉生於弘治癸丑五月二十七日享年僅四十有八娶甘氏貢氏養盛之女子男四長第郡庠生有父風娶王方伯孫女次策娶常上舍世瞻女次籍聘上舍辛養德女次簡聘鄉進士孫元龍女也女二一歸陳大尹萬言子無可一歸楚府典寶馬以禮子化龍孫男三維藩維屏第出維垣策出也月泉之長子第將以是年冬十月十有二日葬君於得勝東岡祖塋之次乃踵予來乞志銘予眷屬也夫復何辭遂銘之銘曰卓哉月泉飛聲少年矯矯振俗家學重宣視象

花縣惠慈且庶民方樂土士方仰旃云胡構誣乃遂歸田譽者不虞毀有求全古今之常又何恠焉我銘爾心我知爾賢爾垂爾後何啻百年過者知名如一日然

明故陝西叅政平丘侯公墓志銘

公諱秩字季常平丘其別號也其先河南項城人洪武初高祖仲禮徙長垣今遂為長垣人云公別業在柳村或又有稱柳村者祖仲禮生三三生俊俊生宣宣娶唐氏生隆繼娶張氏生子男二伯曰福早卒仲即公也公生而慧敏沉重性孝友寡言笑方垂髫時封侍御公口授以詩即成誦了大義封侍御早世事母以孝聞事兄隆曲盡友愛隆嘗遘疾公求醫問卜殆無虛日

撫其猶子嶼峻諸昆弟無異已出至誨教無倦色由是嶼峻喋
皆遊太學而嵒岷亦補邑庠弟子員俱有聲稱公初受學於鄉
進士王君恭肆力百氏操筆為文動中矩度久之論如懸河沛
乎莫之能禦矣恭大加賞嘆以為吾不能為若師也始學詩既
而學禮終學周易年十七遊邑庠二十八領鄉薦三十二登進
士蓋是年實丁丑云未幾尹晉之曲沃曲沃民俗悍而多訟公
申之以禮教董之以刑威不三月而風俗改觀矣會中貴於某
者是時方肆侵漁無忌公獨抗之以正由是邑眾獨免於擾尤
勤於省畊課士節財賑窮闢邪崇正旌節義鋤強暴闡幽隱問
疾苦凡三年轉官去民多泣而留之既而民思之為立生祠以

奉有宗伯李公浩記公既拜御史甫旬日即論司馬王公瓊違
法侵奪御史權朝野莫不悼其風采某年丁內艱公哭盡哀三
年不廢禮是時國方有大禮之議臺諫多以語侵輔臣去者及
免喪再起為御史即又上疏論桂張二輔臣賴 聖朝矜其直
特賜原宥既而並劾輔臣楊公一清及禮官席公書招權納賄
私交黨惡數事家人莫不危且懼而公自如也後卒以忤旨謫
蜀之富順丞公素位無怨言且以汲引後進為已志一時出其
門下者多名士有如熊過有如唐耀如萬邦憲李汝忠熊應周
皆相繼為郎曹內翰焉及轉秦之蒲城尹撫而治之猶曲沃也
居蒲三月遂同知長沙未之任而揚州之命下矣會歲凶且路

當要劇公一切以省費求蘇民因為主毀淫祠斷疑獄是時蝗
不入境既去任民思之猶蒲城也有太僕盛公儀去思碑既而
自揚州轉秦之臬司副使兵備肅州肅州邊境公教之且畊且
戰有遊擊嚴愷者嘗貪虐殺無罪軍士公叅劾之用雪其冤由
是軍中歡聲雷動後卒以恩威鼓舞士心捷報虜人 上聞有
金幣之賜尋轉本省藩司叅政忽有尊鱸之思乃一疏辭疾以
歸日惟畊讀自娛與親朋宴集初未嘗事矯飾表正鄉閭人多
化之尤善處橫逆而不與之校亦吾鄰境所共稔聞之者娶陳
氏贈孺人生女一歸太學生楊希津繼娶馬氏封孺人生女一
歸苑馬卿趙公祐子萬再娶賈氏生子男三長崢次萊次某尚

在襁抱俱未聘室公生於成化二十三年夏四月初九日其女
嘉靖十九年二月十八日也得年僅五十有五云訃聞無近遠
幼老莫不痛悼揚州之民至有越疆而來吊哭者且以金帛奠
公之孺人賈氏皆却之且曰未亡人以幼兒故弗能死然先公
之廉弗敢忘也此物奚宜至於斯是時邑令杜君緯嘗至曲沃
見公生祠而賢之比聞賈孺人之賢又嘆公之教行於家也因
即請於當路將薦公入鄉賢祠以廣風教嗟乎頽風澆俗之餘
而公之夫婦其不可泯有如此雖以節義成雙追羨古人可也
公之猶子捷以狀來乞志銘將以是年十一月初二日葬公於
城西之新塋遂志而銘之銘曰有美君子曰號平丘德崇而謙

行敏而周捷聯科第名繼前脩化孚郡邑威震虜酋霜臺封事
直氣橫秋甫登藩伯輒復乞休表裏洞澈詩酒忘憂敦爾族黨
誰復怨尤卓爾內室誰復匹速廣爾後昆足振箕裘銘以昭志
河漢長流

明旌德丞蕭公墓志銘

公物故之明年是為嘉靖辛丑是年冬十月庚午公之子枋將
葬公祖塋之次乃請狀於其舅氏鄉進士馮子延齡復濫托予
為志銘以傳按公名吉字順之號龍溪世為開之新惠里人也
曾祖德明賢隱於農家用饒裕祖敬仕楚之高橋巡檢父誠坦
夷儉朴為鄉飲大賓未幾以壽膺冠服既歿尋以仲子漢年勞

贈蘭州判官母朱氏贈太孺人公生而敦厚知德向學節用好
賢幼時大為高橋公所器重造就外傳嘗從鄉先生劉字民遊
成化甲辰祖命援例輸粟山右充國子生卒業歸省婦翁馮少
令於山東滋陽馮公愛其明辯携以自輔居三年然後歸所得
贖儀諸物用以治生故業日進而家賴益饒正德間弟漢亦以
公賢得遊太學一時以友愛稱於里黨庚午歲入選得授南畿
旌德丞是邑民健於訟俗梗於頑頗稱難治公蒞任凡佐三尹
奉職惟謹加之誠心自牧謙已無傲延及邑之士民父之翁然
稱其賢懷其惠矣故事邑之均徭更數歲始一審編積弊之久
人人知之人人莫之能革也公當其期率邑之里書故老矢於

邑廟糾察防範曲盡心力不三月而版籍盡成山隴水田高下咸當其可由是下而小民上而撫巡靡不感悅之者遂以考績進迪功而脩職矣將轉官以封君恙作遂浩然有歸志民吏多懇留者乃再三請於當路而後允有年力精強方堪委用引疾求退志亦可嘉之語遂致仕歸歸之日封君疾少差公捧觴彩舞日與兄弟親朋徜徉林壑間及季弟漢判蘭州行復以公廉二字勸以急流勇退四字規焉故其兄弟始終皆獲完美以還則公之實行大畧可觀已矣公弟慶早卒遺孫鶴璞有子植俱庠生公篤念同胞各與三百金植因得援例入胄監鶴與昂亦均沾其一視之愛各立田業漢以疾先公卒公且延親識友生

究儀典造冠服焚黃壠上士類莫不榮其事而嘆其用心之惻怛也庚子忽構疾百藥莫效公曰生死命也何以醫迎為哉未幾卒於正寢實是年十一月二十六日也公生於天順甲申某月某日享年七十有七娶馮氏有賢聲人稱內助滋陽少令馮公女鄉進士松菴姊也子男三尚仁尚義俱早歿枋蓋晚得之者為承差娶延昌令王朝章女女一歸監生張甫男錫極男孫二曰蔚聘士人陳以正女曰芬聘庠生張岐女女一尚幼女孫二長聘庠生張大化男某一尚幼枋卜日葬公於焦二寨遂據其履歷顛末聊復志之如右因憶往年嘗為高橋公墓表乃今復為公作墓銘耶存沒之悲今昔之感蓋有激吾衷而莫能已

者乃復銘之銘曰吁嗟龍溪嘗承旌德歲月未幾乃忽永訣公
有遺愛山高水長公有後昆蘭秀桂芳喬齡茂實抑又何悲盈
虛消長宜順爾歸

明中憲大夫鄖陽府知府梅軒馬公配孺人郭氏合葬墓

志銘

王子辭卿之十二年是為壬寅乃夏五之乙酉鄉秀南樂石子
汝礪持其友晉人馬子巒狀來乞志銘既嘉石子之篤友而又
喜馬子之不朽其親也遂據狀而為志志曰公諱騃字世用號
曰梅軒曾大父弘毅大父彬私謚曰卓行居士父忱字恂如別
號曰東山母杜氏平陸望族封孺人宋元時家許州之長葛縣

至正兵亂高祖德以儒生携家避地中條山今遂為解州夏縣
人云德祖自卜塋域謂所親曰吾子孫當有以文學名世者卓
行府君夙稱好義嘗出粟貸饑不責息度無以償并取其券焚
之蓋正統時也自宋劉永一之後一人而已乃淮安守劉忠愍
公之孫祥嘗聞而高之因著義士傳嘉焉故老至今能道之東
山翁學有端緒以尚書薦進士於鄉比南宮曉揭在乙榜會母
老因就祿養署教富平學正再歷清澗東平皆循循善誘後判
武定州事卒膺爵命為工科給事中從子貴也東海公仲子都
諫張公弘嘗志其墓妣杜夫人通孝經女史諸書樂施予故老
以為有采蘋之遺風焉梅軒公之生也氣宇魁梧眉目踈朗如

畫幼穎悟與常兒異篤信好學出於天性父母懼其勞之過也
間或止之則箴燈於器以俟親寐復讀誦如初故其所業輒終
身弗忘云方東山翁之歷三學也每誨諸生悉如族子弟或以
他故出即令梅軒公攝講是時公年纔十有二衆以其年少易
之公即正色作曰文中子白首北面古之人一字稱師諸君未
之聞耶由是衆皆歛容謝過年二十一以儒士領鄉薦時成化
丙午也明年冬始娶孺人郭氏卒業太學從莆田黃公濶華亭
錢公福受學焉咸器重之立文會以友天下士嶺南若丘廷望
太原若陳邦器新鄭若楊一仁皆一時之偉而傑者於是莫不
翕翕然聚而樂也公之所造益弘深矣弘治丙辰登進士第初

授行人奉使周邸階脩職郎未幾選工科給事中馬端肅公見
其文驚曰董賈未之或先也尋轉左給事公既為諫官儀觀日
整進退悉中禮度 孝宗皇帝默眷愛之視他諫官為異旋復
奉 勅清屯田於蜀事峻因取道歸掃會迎遺詔哀臨乃即家
庭設几筵北向長號聞者感動公在官言事多不蓄諫草公之
仲子巒間得其遺稿讀之如論李廣之黨宜窮治外戚之權宜
禁戢諫官吳舜之狂直宜包容皆時政之要而切者也 武宗
皇帝即位有白金文綺之賜以績進徵仕郎推封二親及公之
孺人旋擢刑科都給事中正德戊辰廷試會掌試卷時宰臣某
與逆瑾結納勢焰方熾衆觀望意指欲以其子魁天下獨憚公

抗直莫敢與議公得涇野呂公卷倡言宜首選西涯閣老方猶
豫已而涇野竟首選如公言蓋公之補外亦自此始云是時逆
瑾用事而公以職當盡言侃侃不少屈瑾亦多勉從之有附瑾
新入為給舍者同官被逮假瑾納賂焉對賓僚誇且有矜色公
義形於色至鄙之以無耻客皆縮頭吐舌自以為莫之敢也蓋
卒至粟罰數百而免於竒禍之中亦鬼神默相之與先是逆綵
拜瑾為義父驟入銓衡公自蜀還會綵父宿同驛館不與交一
語綵聞之以為慢已會時宰夙憾公遂乘之搆毀出公淮安府
推官公既視事恠獄吏日報囚病時方大疫乃躬造閱獄間踈
放流徒以下幾數百人大辟甲救而獲生者二人焉揚州有某

者以所假姻家金首飾噐令家童送還途觀優戲忘而失去匿
入淮淮人不知也留為傭一日遇故主詰其由詒謂淮人迷以
藥攘其金執之使不得還遂訟於官治淮民罪宜死公大以為
疑曰楊淮地只尺既取金乃復留傭其人殆不近情因取成案
所具藥俾獄盜服之殊不驗蓋淮民被拷而誣服藥冀寬刑責
云爾因咨於當路竟釋焉他如鹽城張生忠元夕遇豪家婦於
隘巷家僮爭道毆辱生群生不能平明日相率詣豪家褫婦衣
報之豪家富且健訟生遂黜公知非生罪且廉其貧出金為生
贖罪又一日有蕭尹者被誣逮公亦遂白其誣尹後官至中丞
公保全之力也其他平反多類此然公方且退遜以為職分宜

然則亦豈人所易及哉公嘗荆杖示罰而民自服施藥惠民而病多痊行部不盛張騎從而老弱歡迎觀者如堵郡守華公璉適並出見之因嘆公以為平易近民不可及也後改官過淮百姓聞而出迎者相望於道郡有何烈女申進妻徐氏皆懼辱身不從淫暴以死公至為表其墓而立祠且撰雙烈記以愧士夫之失節者文宗黃公如金以清新老健稱之然其文未足以盡其蘊識者恨之先是流賊逼境公規畫嚴密賊知淮口不可渡竟遁去時陶恭介公疏薦公於朝有操履端方才識通敏之語至委公儲備軍粟旬日得金凡四千有奇士民告保留公者無慮萬餘人於是鎮遠侯顧公士隆巡按御史劉公文莊皆相繼

以薦則公之人品政事可既槩想矣瑾黨既誅海內以公當恢復舊物宜殊擢顧持衡者無知人之公僅轉同知松江而已公既視篆松多富室由是畏公之廉而欲不得肆數年逋稅一朝完矣都御史王公偵遂又力薦之會丁外艱歸中途得邸報有擢守饒州之命公既歸哀不廢禮服闋再補守鄖陽其聲稱猶夫淮也鄖陽在萬山中路多隘公因過而默筭計之及蒞政量罪人情法可贖者俾脩鑿之至不爽尺寸由是遂成坦途有罪人陳文臯者忿鄖民負楮貨詈取償民母觸柱而死誣文臯重獄公察之甚悉文臯卒免焉他若創浮橋葺廢坊育賢養老振學課農敦風正俗屠奸剪弊鄖陽之人無近遠皆忻忻然以為

創覩也是時楊公邃菴知公父歷外郡勞績為最方擬大用會
免歸弗果蘇有顯官者公嘗以法及其姻黨公由是遂歸先是
有說公宜少貶從俗者公正色曰窮通顯晦命也君子如命何
公平生以直道忤權貴用是仕路蹉跎弗甚利然天下公論亦
以是重公如中丞東磐張公禮則稱公為正氣侍郎樾岡胡公
錠則羨公為真男子則公之所伸者亦多矣區區官爵利達安
足言哉乃嘉靖九年夏六月二十二日卒於正寢據其生成化
二年春三月之六日得年六十有五十二年冬十月二十七日
葬邑之城南辛庄里鳳翥阡祖塋之次郭孺人生於成化二年
秋九月十五日其卒則嘉靖元年冬十二月十五日也享年五

十又七次年夏四月二日始啓其壙與梅軒而合葬焉故老以
為葬而合柩周制也公性孝友事父母先意承顏曲盡其道事
兄來鶴敬愛有加兄罹讐陷為極力伸救至罄奩金弗恤焉先
世器用盡推諸姪其交友更重信義在太學有楊俊貧而卒旅
公捐金助以歸葬於濟南公嘗與其兄主燕醫張圮氏館圮卒
而無子公復為買地以葬仍居授其媪後在松邱背疽幾危一
夕夢圮來視疾明日尋愈人以為圮之冥報云平涼倅吳君綱
罷歸飄泊江湖公賙之弗厭廣西僉憲沙君立逆瑾索利羈於
家貧困失措公過徐州見之愴然動容挾以如淮倒囊資焉嘗
使蜀館稱多恠人莫敢入公徑入而居之因夜坐觀書忽壁上

如人持挺而擊者三公觀書如故不為動居父憂廬中罄不扣自鳴燈下見馘影如斗公亦處之如常崇弗能干自松歸渡江會大風陡作舟師震懼無人色公從容仰天祝曰吾平生或欺君靈民舟當沉否則風亦當息俄而風恬浪妥湏臾數百里矣治經學以平易切實加之體認力行遊其門者多為名士廩門吳憲副嘉聰尤公門人之卓越者也其詩文一以情性自得為貴初得王文憲集恍焉如默會者及聞東山翁與客談韓文退即了大義故公為文章雖出入古今莫可涯涘然命辭立意則本之二家居多所著有梅軒集六卷手簡一卷藏於家孺人郭氏亦夏縣中議大夫南康知府璫之女莊琬賢慧年十二毋張

宜人疾每夕泣拜北辰以禱蔬素者三載雖為父母鍾愛而不私藏一錢事舅姑極備孝養相梅軒公以正公嘗言與孺人處三十六年無戲謔忿厲之語可以為難矣仲子巒幼授書於公退而孺人默授不遺一字於論史事亦然卒之日鄉人共悼惜之子男二伯曰邕早卒仲即巒俱縣學生男孫一曰珂巒早慷慨有奇氣識者偉之肆力於六籍百氏多所著述博而知要信而好古慕鄉先達文正司馬公之風奮然有尚友之志昌黎所謂稱其家兒梅軒公真有子矣繼之銘銘曰大哉馬公忠且孝友卓然凌群生也不偶既登司諫足稱匡糾既忤權奸足彰學守相彼君子契則韓柳相彼小人視則卯酉大哉馬公豪傑稱

首澤流江淮名齊山斗道行治朝氣吞凶醜浮雲富貴誰曰為
有鐵石肝腸誰曰為朽大哉馬公足繼迂叟死而不忘天長地
久

明故樂素居士吉公配安人張氏合葬墓志銘

吾開吉君陳及其弟陽皆以秦中刺史奔母喪而歸將以今年
癸卯夏四月乙酉合葬厥考居士翁於祖塋之次因濫以志銘
托豈不以慶忝交遊知君家世之美且素故耶遂據狀而志焉
按居士諱倫字天叙姓吉氏樂素其別號也世居開州之榆林
至高祖諱惟善冲和而靜莊敏而博蓋龍德而隱者今從祀鄉
賢祠君子以為士林師表云安人則同里張興之女慈而慧柔

而恪沉而寡言幼即與諸姊妹異興鍾愛特甚必欲得佳壻一
日望見居士喜動顏色遂默注意焉公鮮兄弟父考某及妣孺
人每相自計曰兒郎孤立然視其才必大吾門者也盍求婦之
可與齊者既而聞興意乃又自慶曰殆天所以諧人願乎由是
遂真薦以歸時僕婢尚未多畜諸幼且在襁褓姑因進安人而
前曰晨飧無備如何安人方夜舂罷即面以已辦對姑因訝曰
二三小兒汝啜卧尚不暇矧無左右以代何以能此由是黽勉
有無無間朝夕蓋翁姑匪徒不之勞累甚且莫使之知聞矣安
人之賢且敏實自此著焉及祖翁不祿祖母日就衰安人孝養
備至每度置時物之佳者以供凡諸姊妹則厚為餽遺先意以

逆其志其事舅姑而竭婦職有如此者是時家尚未裕安人則盡出簪珥以應公調度日孜孜焉思所以振大其業未幾數年地且增至千二百畝積粟無慮六千石餘遂傑然為郡東巨室云居士性好施予尤矜恤幼老孤弱之貧而困者安人則敬承而曲全之族姪有曰崑曰魏及甥曰王宗者率未數齡莫之能自贍立居士皆携之家養焉安人又且維持而助其不逮既長則各為娶婦遣歸其相夫行義而敦族有如此者居士嘗謂安人曰吾家自處士翁沒書香寥寥未有繼者所幸今有五郎發前人而啓後昆意者其在茲乎友良質鈍可治農曰陳曰隆頭角弗凡可教也遂令二子從樂安司訓于廷噐遊陳字萬言生

而清潤如冰玉幼有聰穎至性勤學好問能文章尋補郡庠廩膳生隆善書因棄儒去為郡掾會居士公疾安人供湯藥竟夕不少懈公因語安人曰吾少孤寒自汝之歸吾家兒曹森立產業增倍匪汝勞動何以至此吾病度不可起兒曹他日之榮貴老夫不及見之矣語竟而沒安人即長號仆地痛不欲生久之語諸郎曰未亡人失所天生復何為所以隱忍而弗死以有兒曹在也諸郎皆感泣不能仰視已而收淚應曰敢不奮發安人遂率友良專力農事不欲妨萬言舉業季曰陽字萬春幼未知進取萬言遂激而進之未幾入府庠為弟子員日漸有聲當是時萬言與隆內眷州居者率數口萬春携眷而之府庠視州居

亦不少減凡所以給用度於晨昏者皆取辦於安人其教子隨才而施克盡母道有如此者萬言嘗見知於大名前守柳泉馬公至以魁解之才標榜於髦俊先巡按御史張公臨大名閱萬春文驚且喜問所以從學者因以兄萬言對御史笑曰吾固知學之有自也丙子萬春果舉順天鄉試至己卯歲則萬言亦舉鄉試十一蓋壁經之魁亞也鄉人榮而稱之遂呼為大吉小吉云是可以觀安人義方之效矣然二子屢困春闈安人則又每速之出仕曰爾父不及見爾今日已足恨矣爾不蚤出吾又何以見爾視篆耶言之且揮淚由是萬春遂就銓部除知陝之秦州萬春嘗欲迎養以秦山迢遞不果然亦從安人之命也萬言

則侍安人於里者又三年復試南宮又弗利由是決意弗出為同志者勸亦就選初冀得近地以便養已而授陝之河州視秦又加遠矣由是萬言身雖在秦每食未嘗不在榆林然而安人先此皆教之以急從王事無以老身為念其知國家內外大體而卒成忠孝之訓又如此者庚子秋萬言之子澄亦中順天鄉試安人雖思二子從官於外而得孫在側且捷報臨門則又喜倍於昔其教澤之流及於孫使遠近稱吉氏之盛又如此者辛丑萬春轉二府臨洮壬寅萬言轉鄭府長史為王所禮深以近梓里為慰而安人之訃至矣悲夫居士公生於某年某月某日卒於某年某月某日享年若干安人生於景泰六年六月十二

日卒於嘉靖二十一年十月初七日享年八十有八子男五長友良娶翟友女次即陳長史娶劉浩女次隆娶郭桂女次即陽臨洮府同知娶李儉女後安人一月卒陽與兄秦地皆有惠政士民思之迄於今不衰次陟娶濮州劉憲女女三長歸同里賈巖次歸十八郎里薛輓俱卒次歸張溫里李思聰孫男十二曰肅曰慎友良出也曰澄庚子舉人陳之長嗣雅有父風蓋氣凌雲而才華國者也曰薦府庠生曰芳曰芬隆出也曰須曰湛陽出也曰沾曰洽曰冲曰某陟出也女孫十五陳所出者五長歸國子生張錫保子潛次歸引禮官胡瑞子國子生應召次歸國子生徐遷子宋早卒次聘江西叅政王世爵子州庠生三吾次

聘鄉進士吳汝礪子橋俱殤隆所出三長歸大韓里李汝實次歸十八郎里庠生楊存仁子如松次歸柴如桐陽所出者五長聘國子生馬永年子州庠生若無次歸延津尹陳治策子行可次聘丘縣尹許伸子某次聘庠生郭崧子柅次聘清豐縣國子生王相子某陟所出者二長歸南孟里劉一蘭次聘劉湛子某曾孫八曰存留曰存在曰存安薦妻某氏出也曰大同曰僉同澄妻張氏出也慎出者二湏出者一俱幼曾孫女九薦二澄一慎二芳二芬則一也萬言及其弟萬春將以安人如卜而啓居士公之墓合葬焉禮從周也遂又銘之銘曰嗟嗟安人早歸名家相夫惟良教子孔嘉福萃有年慶衍無涯嗟嗟安人號稱慈

孝既多後昆且徵善報望彼郡東佳城實茂嗟嗟安人賢孚里鄉柔足範內貞足流香夜臺雖寂封誥未量嗟嗟安人歿亦可寧共姜孟母永垂令名誰曰後世而之女英嗟嗟安人行且弗磨霜清蕙帳哀動林柯觀風者史視此銘歌

上蔡陳孝女壙銘

孝女者名九小字閨一郡大夫陳侯歷田之長女也侯行年四十有五而未有子閨一生而秀朗性復明慧不妄言笑宗族稱孝舊矣五六歲即能從事孝經烈女傳諸書講而解之了知大旨若乃剪綵刺繡其緒餘耳侯因教之學書法楷且端而弗媚侯自以為鍾愛之篤不減子男云十二歲嘗從侯出守廣德會

母氏構疾乃躬嘗湯藥慮恐傷其母而又謂非此莫之去疾也至憂形言動者累夕未幾母小瘥始忻忻然有喜色焉癸卯春侯再來守開母疾復作問侍膝側如初然以更歷暑月冒感熱瘴因傾而卧者踰旬日侯未始知也乃秋八月侯再迎醫治其母女愈益驚惕至泣守榻前未之須臾離也是月九日陡病頭痛恐貽憂二親也終弗言然猶扶病而起禱母疾焉既而病益劇至十二日卒侯與其夫人如失左右手撫而哭之幾裂五內中外聞而悲之嗚呼其可哀也已矣君子曰慧而旁知書史非女之常也善事母慈而弗違父訓是女之孝也其常可能也其孝是難能也昊天柰何奪孝女之速耶君子是以知理數有時

而或舛其以此乎閨一之母李氏派出名家賢而內助侯以才進士兩守郡城而惠愛雅有古良吏風然恬退出自天性因閨一之沒而尊鱸之志若弗可禦者君子又以為難能云閨一之生也在嘉靖十年十一月初六日其卒也嘉靖二十二年八月十又二日其發而歸在某月某日其祔葬祖塋之次在某月某日初許聘考功郎中胡君之子甚至是年僅十三云銘曰何以生何以死發爾喪哀爾齒汝之蔡是爾止何彼蒼不亮此嗟爾孝女曾子

明韓君守默配闕孺人合葬墓志銘

吾開同知韓君文炳丁內艱將歸因以其考妣請志於端溪王

子蓋欲昭先而示後也可以觀孝子之用心矣按狀君諱玉字廷璽守默其別號也世為揚州之江都縣人君性慧敏意氣踈暢幼潛心業儒不果遂從事商賈往來於江湖間用是家道充裕日益以盛嘗聞談易者至積善之家必有餘慶即喜動顏色怡然竟日若有夙契之者故其平日安常履順事必求誠不事虛文粉飾親儒而近賢重義而敦信慎交而睦鄰未始一日衰也少事繼母馬以孝感由是鍾愛無異已出其與人交也曾無毫髮競忿雖衆論紛紜而折衷數言無不允服若夫事涉分外則未嘗敢為干預鄉之人侗齋張金義其雅而珍愛之遂偕鄉之諸士夫以詩文賀焉由是守默之號出矣君素蘊不吝施與

族有貧乏者解衣衣之死喪者以財濟之賦稅不能自辦者至默為貸之而族類中遂有終身無賦徭之累者一日獲遺金若干於道上以俟失者既而其人果皇皇然涕泣以至君惻然呼而與之曾無德色其人旋復願分其半以謝君笑曰吾與其受半何若獨取其全可速持去其人叩而返一時觀者莫不動容稱嘆云君性不喜飲中年後飲亦不過數酌惟對佳山水名花木則忻然獨好之而即欲徜徉其間識者以為市廛而能飄然風塵物表亦寡儔矣蚤娶關氏維揚舊族也柔恭而儉勤事舅姑以孝聞內脩婦事歷歷整飭無一不盡其力相守默君綜理家務應酬賓客供祀祖考初無所廢缺及守默捐館為之哭泣

幾殞蓋自此孺人始病矣然猶力疾而教其子各隨其業以戒之勗之不少假貸至是遠近老幼則又稱其為女中丈夫云若其訓迪諸婦女孫尤為嚴憚不喜世俗浮屠以為人之善豈必事佛而後見哉然濟物慈幼之念栢舟斷機之志至老無倦孀居幾二十餘年莫之有改是亦可以觀孺人之大節矣君生於成化丁亥夏四月二十二日卒於嘉靖甲申春三月十三日享年五十有八孺人生於成化癸巳秋八月二十五日其卒則嘉靖甲辰夏六月初六日也享年凡七十二云子男四長鎡蚤卒次文煥業商娶孫氏次即文炳業儒以才俊有聲於淮海初選吏部即同知開州事佐政僅三月而已娶王氏知縣王君顯宗

嘉志金 卷之五 四二
女也繼娶楊氏國子生楊某女也次文燦業商娶葉氏今刑部
侍郎葉公某女也男孫某女孫某文炳擇某年某月某日歸葬
孺人於縣城北郊迎恩橋之左合守默而葬焉生事死葬動皆
以禮可謂孝也已矣復為銘銘曰彼美君子政佐吾開儀容嚴
雅足稱俊才厥妣孺人既貞且賢相夫教子何愧後先遂致書
香肇於左橋官踰兩月撫字心勞祿養將試忽以訃行輶輿在
疚吊者愴情厥考逃名從事居皆嗜善如素人稱寡過佳城何
許是曰維陽邑鄰淮海雲濶天長我銘述志我心無窮示爾後
嗣宜敦素風素風曰何惟勤惟儉守此勿替百世如見

明四川按察司副使西巖宋公墓志銘

公歿之明年厥子其治以志銘請會予轉官蜀轄不果今年丁
未予自蜀入賀 萬壽且復叨轉南都將行其治再請如初既
恨冗奪之咎而又嘆故人之美不可無聞於後也按公諱欽字
敬夫別號西巖其先真定人也曾祖郁者永樂間徙開之慎德
坊僑居郭氏遂依郭姓郁娶王氏生子恕恕克郡庠弟子員有
聲泮宮間每嘆曰吾自上世以來宋氏譜可考也蓋復焉遂復
宋姓娶戴氏生子男五曰安曰寧曰寶曰完曰宏寶生公後以
公貴封戶部貴州清吏司主事復追贈按察僉事云性孝友朴
實力畊課子家範秩如也配張氏封太宜人今八十餘無恙子
男二長即公次銓早歿女一歸郡人陳嘉福公之生也幼而莊

重不群性英邁有智識未幾弱冠入芹庠督學御史每至試考必器重之曰佳士佳士蓋自是丙子秋遂領鄉薦丁丑復登舒芬榜進士二甲第七授戶部貴州清吏司主事出納錢穀一毫弗苟越明年戊寅武廟北狩雲中過晉秦公實奉扈以行供事飛芻動合矩度辛巳還京以三載考績擢本部員外郎是年八月十五日丁父憂扶柩還乃朝夕哀悲暇則築垣樹柏見者興慨既免喪再授刑部如初官凡斷獄必求平允民無怨言居無何擢山西按察僉事旋復分巡雲中雲中軍多兇悖公下車頗見嚴憚有作孽者擲匿名書飛矢入院中計欲恐嚇公然公方處之整暇終亦無他虞既還省吏歷諸道所至有聲辛卯擢

蜀之憲副兵備建昌然地雜番夷土官率多以金餽者公怒刑於庭笞之餘蜀人始嘆服云是時當路多薦公者然公嘗得罪本兵因竟構讒罷歸既歸日惟放情詩酒與田夫野老相往來雅歌投壺釣魚橫舟恣意風月示不復出一日疾陡作遂卒於正寢實嘉靖二十四年閏正月二十一日也據其生則己酉某月某日享年僅五十有七云嗟乎豈亦數耶配王氏先主事佐之孫女封宜人子一其治蓋公晚得者有父風聘國子生張友女女二長歸同里劉中立次歸呂丘里王若蒙又女一壘室段氏出又女二劉氏出也俱幼公之子其治先是葬公城西北郭家寨祖塋之次若乃志銘之告成則丁未秋九月二十五日也

墓志銘
遂銘之銘曰吁嗟宋公天生爾才亦何豐吁嗟宋公天速爾年
乃遽終吁嗟宋公幸爾有嗣揚休風

明勅封安人孟氏合葬龍池歐公墓志銘

安人姓孟氏薊州處士達之女通判龍池歐公之配也龍池公
先安人卒茲將啓而合葬思賢以予忝年家因以文字托焉安
人派出名族生而淑婉父母鍾愛不輕許聘人龍池幼聰慧有
英氣司衡校者目為俊才用是卒偕二姓之好既歸歐門是時
惟龍池母在堂安人曲盡孝敬歐舊稱大族視他氏特盛安人
相夫勤儉至親操杵舂雖服飾鮮潔然而弗效流俗之奢也先
是龍池潛心大業暑寒不怠安人供其食飲至或脫簪珥以資

之若夫教子姓則慈而能嚴處妯娌則和而不爭蓋自是家政
日益睦矣乃正德丁卯龍池果領順天鄉薦嘗語人曰吾業不
至墜弛安人與有力焉然屢試南宮弗利因就選判府常州安
人自奉淡如猶夫疇昔蓋其儉素出於天性有如此未幾龍池
以忤上官因致政行李殊瀟條安人又數以安命慰之既歸日
惟從事吟咏兼之雅好賓客每會未嘗不歡洽也未幾仲子思
誠季子思賢皆次第舉進士歷官所至咸有能聲嘉靖甲辰思
誠昆王既免龍池喪誠補東昌賢補合肥交相迎養丙午安人
在東昌遂以疾弗起時二月二十三日也據安人生於成化丙
辰某月某日得年七十又一云子男四思廉七品散官先卒娶

楊氏運同臣之女次思誠己丑進士知府娶李氏封孺人千戶
榮之女繼劉氏封孺人中丞聰孫女又趙氏總兵杲之孫女思
忠早卒思賢戊戌進士先工部主事今改刑部娶賈氏禮部尚
書斌之孫女女一歸國子生李守仁早卒孫男六士稷郡庠生
娶蕭氏指揮欽之女士阜士文聘金鄉尹王沂女士訥士蒙俱
幼孫女七已歸者王化成劉贊陳廷相楊炳其壻也許聘者上
舍范麟憲副高進之男也餘在室曾孫男二某某思誠先任大
理時 郊祀覃恩安人嘗獲封乃是年五月十七日啓龍池之
壙而合葬焉夫以龍池夫婦之賢若是其子姓又若是盛也歐
氏前人可槩占矣嗚呼休哉遂銘之銘曰賢哉安人早歸名家

相夫有道克稱柔嘉卓矣龍池見幾投閑清風高節笑傲雲山
篤生諸子甲科聯芳誕承 恩錫光照夜堂循良並著行且要
津誰謂龍池屈而未伸

明故臨淮丞北畱左公墓志銘

丁未秋予將之任太常南都公嘗載酒過訪秉燭夜宴顧德音
在耳道範在目日月曾幾而北畱捐館且隔歲矣乃知浮生若
夢古之人非誣言也按乘龍子郭生九遷狀公姓左氏諱淮清
甫其字北畱其號也其先山東館陶人高祖欽元末來尹清豐
多惠政既而樂其土因占籍焉遂為清豐人欽生習習生鳳凰
生昂公蓋昂之長子云昂嘗為邑耆老勤而儉和而不傲善幹

墓志銘 卷之五 四十一
蠱基業遂以寢廣今為邑之巨族君子以為隱德之流澤如此
次子曰江先公卒公生而體貌魁梧質任敦朴不事文飾有古
之遺風正德間補邑庠弟子員尋晉增廩且博覽群書以才俊
聞於時然而屢試弗利棘闈君子以為命信矣竟以歲薦入太
學一時天下士多樂與遊者是亦可以占公之素蘊矣嘉靖丁
酉入銓部考選得丞臨淮臨淮西望淮甸南望建康蓋鳳陽繁
劇邑也公以分理應事殊整暇比及暮月而頌聲出然多以其
素志推而行之則又往往動合矩度甚至自裹餼糧用給宦邸
若乃催科寓以撫字行已務尚廉平所謂一介莫取又可占矣
由是淮民遠近愛悅而貪昌者至笑其泥古共目之為癡縣丞

云是時邑侯有御史謫官曰劉漸齋者獨器重公時復相與
咏往返至是君子又兩高之若其承上官之檄效民牧之勞革
邑風之澆篤守官之箴又莫之可殫述也乃一日忽喟然嘆曰
巧吾弗能拙吾弗容吾盍歸乎遂力求致政父老多悲其去至
望其行李瀟然有欲涕出者既歸別業在留固村者距邑二十
有五里厥田沃饒因於園林邃地構一小堂扁曰後樂乃日與
朋舊登眺其間或決渠灌花或操斧剖竹臨溪觀魚熙熙乎不
知歲之將邁今里之老弱猶歷歷能談之不衰君子則又以北
畱進退無累洒然出流俗外可尚也已至若祠堂以祀先義田
以敦族家塾以啓蒙則又近時所僅有也公平生賦性介直人

有過而規之無少委曲至其却無故之獲則有如李雲之馬汝和之金蠲賙貧之財則有若急人之婚喪救焚之鬻水堅晚節之高則有若非公事足不履邑宰之庭而又苦心自牧手不釋卷圖書盈屋几席之間皆格言也有北畝漫稿諸書若干卷歲於家夫以北畝不卑小官不廢大節不枉素履亦庶幾乎鄉先生沒而可祀者又何必榮以金紫拔以甲科而後為遇也哉公娶史氏生子男一曰譜早卒繼娶白氏無出俱先公卒繼娶王氏生女一曰洵歸上舍楊天麟子思曾側室李氏生子男一曰輔禮部儒士篤厚向學有父風娶吾小弱弟崇壽仁徵女孫男一曰學韓孫女一在襁褓俱輔出也公生於成化丁酉二月廿

日其卒則嘉靖丁未冬十月二十日也享年七十又一公之子輔以今年某月某日葬公祖塋之次使來乞銘遂並綴之用示其後人銘曰彼君子者是曰北畝拜官少尹聊發其藏由學而仕未鑿其良繼子而孫益紹其芳雲環岡秀竹翠松蒼爰比賢哲後先翱翔古曰狷介誰謂其亡

明故兵部尚書龍山戴公墓志銘

公姓戴氏諱金字純夫別號龍山始祖伏一居徐之百步洪棗林岡宋季避兵徙家於漢陽今遂為漢陽人四世祖景文舉洪武三年鄉試第二人明年會試在乙榜授河南武陽縣教諭以學行著聞沒而得祀鄉賢蓋公之開業祖也教諭公傳二世生

愈愈生伯珍配陳氏實生公者公之生也聰慧性成既長舉業
若不求甚異者然自沛乎鏗然矣一時同門之士多推之者正
德丁卯舉於鄉甲戌登進士試政未幾授蘇州府推官會庫亡
折糧金若干兩長吏日考掠守庫者竟莫之得公乃偏召諸糧
役於庭陰以一牌硃塗之實後堂暗室因諭衆曰吾有神牌在
後堂能辨盜若輩可往手試之果盜當即有聲不然者否衆如
約出皆赤指中一人獨不硃遂首服還所盜金而守庫者得釋
去其訊獄擿伏多竒中若此久之以外艱歸既免喪再除撫州
推官其能聲猶夫蘇也撫之民士迄於今頌之嘉靖癸未以治
最徵授廣西道監察御史乙酉奉命理兩淮漕政公精敏有

定識乃條陳便宜酌處鹽法十二事皆舉要切時可見諸行者
嘗積羨餘六十八萬佐邊餉既而大司農上御史績於朝上
嘉之有羊酒文綺之賜士林榮之丁亥按川蜀蜀去京師遠地
邇滇南是時滇盜有曰安銓者構黨煽亂攻掠郡邑蜀稱大梗
事聞廷議興兵誅捕之公以蜀方大旱疫窮民死者相望於
道乃抗疏乞罷兵因躬入險阻撫平之既而疏請發帑金二十
萬通商市糴施藥給種凡救荒活民者舉無遺筭由是全蜀之
民不盡委溝壑公之力居多是可以觀公之蒞政矣未幾戶兵
兩曹連章條上公績上聞之喜復有銀綺之賜又明年戊子
當大比為監臨試事是科多知名士公居臺中歷兩考茂著風

力兼之才猷卓越濟之文學雅博中外多想企而願見者辛卯太僕少卿員缺銓部以公臺彥不宜泛然徙外遂擢公少卿督京營馬政久之以貝錦之構遂叅議河南尋轉浙江左將之任俄轉按察副使矣蓋以謫非其罪故不次用公以愜群情云公既至浙實董飭海防遂徧察要害悉心規畫海邦罔不怡然戢寧甲午以繼母制還丁酉免喪再除江西副使兵備九江戊戌遷貴州藩司叅政頃之會順天巡撫中丞缺由是擢為僉都御史公既拜命乃銳意安攘綏民糾慝選將練兵鬪士日奮曾未踰月邊兵與虜相遇遂乘勝獲首級馬噐以歸事聞勞賞倍常已亥邊將弗利公以撫臣與責改南太僕少卿明年擢順天

府尹是年為庚子大比提調試事并有程度歲辛丑上新太廟欲得西南巨材遂擢公為副都御史總督大木公承制宣力惟謹采擇深入窮谷得異木數千章集都下事竟徵入為大理寺卿已而工曹以為鳩材清廟仰裨聖孝宜殊擢之由是為右都御史是年甲辰廷試充讀卷冬十月兵部缺尚書遂擢公公被命感激誓竭忠貞首陳安攘十二事上省覽嘉悅之謂戴尚書賢可述大事公既膺眷受知即以身許國毅然為所欲為方經營數月然竟致其事而去君子惜之公敷歷中外三十餘年政事勲名炳炳可述顧乃未究其蘊謂之何哉性素儉約至賑貧恤孤惟恐不及尤敦族孝友孚於里人且未

嘗一日廢書不讀所著有三難軒集使蜀前稿靖芒紀事救荒
事宜按蜀續稿滁陽紀勝督木事宜諸書藏於家公既歸徜徉
泉石俸四載歛感未疾而卒卒之日精爽無幾微亂蓋其養素
積於漢陽播於宗人乃次日為之罷市是亦可以觀公之生平
矣先是公以御史勅命封贈其父母及大理卿並贈祖愈父
伯珍為通議大夫祖妣廖氏母陳氏繼母蕭氏俱贈淑人公前
配蕭氏累贈淑人繼室范氏累封淑人俱有賢德子男四伯曰
江郡庠生娶指揮易堂女仲曰淮官生篤實有志娶武昌指揮
孫柱女叔曰河岸生聘御史朱衣女季曰漢尚幼未聘女三長
歸大司馬詹公同之玄孫懋次歸監生黃坤吉次幼未字孫重
慶聘進士朱君寵之女公生於成化甲辰十一月十四日卒於
嘉靖戊申五月初又七日享年六十又五云公之子淮等將以
是年冬十二月葬公於龍霓西北公人山之次以予壬午嘗僉
事西江過撫州與公有舊雅因濫以志銘托義不可辭也遂按
袁太史狀作志銘焉俾之銘曰公之才其九三之剛耶公之德
其六二之方耶公之名謂遂已耶曰吾猶疑其存未信其亡也
孰呵護其旁耶孰發揮其良耶公之後謂可量耶曰吾固知其
雄於地老永於天荒也

明贈光祿寺少卿監察御史覺軒王公墓志銘

按公門人陝西叅政熊君榮狀公姓王氏諱相字夢弼覺軒其

別號也汝寧府光山縣人五世祖勝四弟勝五嘗避兵亂自楚徙居老鸛巢因家焉曾祖元凱祖彥祖皆有隱德弗仕父珠幼讀書有才俊名後為安東縣幕小心贊政有點民誣奏者及事解其人復且犯盜兄弟三人皆被繫邑令欲並置之死以償縣幕憤縣幕弗忍從及署邑政竟活其季曾無幾微介諸中君子以為長者云公之生也頎然長軀而豐貌雖天性樂易然亦不詭隨流俗先是縣幕翁每謂人曰大吾宗者其斯子乎遂延師勤課正蒙考業後以公貴追贈為監察御史妣胡氏贈孺人覺軒賦資穎邁習舉子業往往有警異語辛酉中河南鄉試正德戊辰登進士初授淮之沐陽令沐隕邑僻民貧公帑無夙積會

歲且大饑民日流移覺軒百方求所以濟荒者因請官錢數千緡賑之至躬親計口而給焉由是全活者甚衆逆瑾用事嘗變賣鹽引及沐陽覺軒乃白之當道謂舟楫不通百家之產未足以當千引之費後竟事寢吏有受賄伴為人申辦者覺軒時方訊決吏乃持手藁以進故問字之未識者覺軒知其詐治之立服蓋自是狡獪者莫之敢肆矣邑庠屋壞覺軒為脩葺之每謁廟後親啓群經而講究焉沐之士子翕然向學自覺軒始也時山東盜起近遠騷然覺軒乃築城廓浚池隍練民兵由是盜相戒莫敢入境者他如撫鰥寡鋤強梁恤獄訟正風俗裁冗奢未及朞月而賢聲出矣當路交薦銓曹風憲之缺覺軒實稱首云

比啓行沐民老弱泣隨者相望因留其雙履既而且立碑以申去思未幾拜山西道監察御史獨持風裁門無私謁及領湖湘清戎之命乃更飭法令定立條格使官吏有所畫一以繩里胥用是軍政乃清而宿猾屏迹幸菴彭公聞之有嚴明端慎之許嗣後奉勅閱城池驗軍器凡湖山隙地盜所出沒者悉令修築以為捍衛蘄府往嘗作看花樓於城隅至侵及池隍為魚沼覺軒一切按之以法始還其舊又嘗上封事有設守備以安地方禁科害以恤民兵責守巡以祛宿弊查恩例以免拖欠造軍器以節民財復舊規以革冗員事皆切於救時而冗員云者則指總兵權宦也楚人迄於今頌之雙鳳山二程夫子所生地

也因重新其祠華容劉公東山里居為薦䟽起之並及錄用其嗣至若群小憑依狐鼠必懲之不少假借時邊將多羅織平民指為奸細以冒功者無慮三百人覺軒察知其寃將奏聞於朝邊將懼乃賂權勢冀獄成以掩其詐且遣人恐嚇之而覺軒乞不為動尋出按山東風采視昔益倍先是臨清地衝要設鎮守太監一又各倉場設至五六有司供費動以萬計軍民病之覺軒按臨初即會議以聞辭甚懇切而又榜之衢市以示禁約由是有司始不敢過於奉承無賴始不敢恣於無忌矣然渠輩而遮留者無異沐陽也覺軒方從容就道然自是病作未幾戊

寅七月十五日卒焉享年僅四十有九云明年己卯冬十月某
 日葬於四山蘆花溪之原厥子家士家賓俱哀思盡禮汝南稱
 名家孝子云覺軒生而孝出天性每念封翁未及祿養必為泣
 下敬其兄良輔處士殊盡友愛兄沒奉嫂氏撫遺孤每給田屋
 與之無吝色待族衆至捐俸以輸其稅宦居垂十年餘未嘗為
 自私計內外雍肅不經之事未嘗一出諸口有奏議文移詩稿
 若干卷藏於家娶章氏封孺人子男二長家士丙子鄉進士尹
 臨胸才猷敏飭有能聲次家賓甲午鄉進士今為石首尹愷慈
 慎恪汝南謂其悉有父風女三一歸舉人胡士淳一歸盧采一
 歸胡恩皆庠生今 皇帝即位追贈覺軒光祿寺少卿諭祭一

壇鄉邦榮之乃至御史蕭某按大梁奉 詔采輿論移文有司
 遂又從祀鄉賢祠嗚呼其亦庶幾不朽也已乃銘之銘曰堂堂
 偉人特起河之南兮卓卓令名永比石之盤兮振振公子同稱
 令之賢兮昔我着花飽領公之談兮落月空梁尚憶公之顏兮
 光先裕後宜公澤之綿兮

明太學生西野馬子墓志銘

按環山陳子狀西野子諱永徽以慎其字西野其別號也吾開
 之西郭里人云西野既沒之六月厥子出湖走書京邸謀及厥
 親錦衣郝黃坡來乞志銘嘉其知所以托親於不朽則雖未之
 躬造吾門弗論也遂以素所悉者援筆而為志志曰往者予以

備員工亞北上西野嘗餞之郊亭倚馬馳觴夕陽分袂日月曾
幾乃忽聞其訃耶傷哉傷哉西野生而通明善滑稽喜詼諧似
有東方朔之遺風者然而晚年儉德齊家推情睦族樂賓問舊
而又銳於幹蠱昌黎所謂稱其家兒者非與顧以一疾弗起且
未嘗小試其蘊命實為之人其柩何曾大父諱玉玉生騰騰以
例貢入國學丞山東之萊陽有惠政騰生宗範宗範生子三伯
某仲某西野其季子也宗範亦以例貢 武廟初序班鴻臚旋
改檢校都察院因受業大學士楊公邃菴大為同門喬公白巖
所器重蓋其素所燕會往還多天下知名士是可以觀西野之
源流矣母劉氏封孺人考功正郎相之仲女也有淑德是生西

野者西野娶郝氏錦衣戶侯郝君某之女貞惠柔嘉人稱內助
生於弘治甲寅正月一日得年僅三十先西野卒繼娶侯氏吾
外祖副憲公之孫時畏女也賢弗讓於郝氏子男二長出湖以
輸粟入國學郝出次某尚幼侯氏出也每思西野人物之評品
時事之商訂親黨友朋之交際其言論風旨洒然可聽凡四時
令節輒具蔬果酒餚分餽諸姑伯姊及其父叔流葷鮮及馬自
奉殊儉約不喜奢靡嘗謂出湖曰驕肆淫侈德之賊也勤儉素
朴家之本也爾曹勗哉其別業數區皆沃饒之田至連阡陌僮
婢司耕司織類有常法主人則坐受成數非大青未始至詰也
故僮婢咸樂為之用先是瞽兄某求異財日夜以泣西野聞之

乃令悉取當意者徐收其散無怨言又嘗出息金數百至其負者西野率多毀券不復求償識者益高其義若其生平雅量或遇非禮之干不情之謗無心之失則又弗屑屑與校焉此其曠識高標亦可因之乎見矣西野生於弘治丙辰八月十一日其卒則嘉靖己酉正月十三日也享年凡五十又四云出湖將以今年冬十月某日從治命卜諸新阡與郝孺人合葬制也乃綴之以銘銘曰我昔長安見子高坡時方戊辰會我登科歲月飄忽奚啻織梭倏仰今昔何異南柯鄉稱克家賓羨綺羅茫茫大塊薤何足歌誰使淪沒竟侶煙蘿悠悠蒼天將復柰何永言弗朽獲亦孔多

明故封撫寧侯夫人柳氏墓志銘

夫人姓柳氏德貞其諱正叔其字也其先安慶人乃安遠侯柳公璟第五女撫寧侯朱岳之配也母支氏夫人實生正叔者正叔生而儀容莊秀德性柔嘉寡言笑安遠及其母每相謂曰是兒德器不凡異時當為貴人婦比長太師武莊公為撫寧議婚聞其賢遂加聘問焉是時正叔歲方十又九矣逮歸朱氏事武莊公及太夫人蔡氏曲盡孝道與撫寧則相敬如賓云武莊夫婦喜曰新婦得人矣正叔雖生長閨閣然雅愛儉素凡歲時家廟之祭必躬自省視務極精潔雖隆冬盛暑必具簪珥整衣服立於階庭至親閱飲饌以奉舅姑若乃延賓客則豐腆倍常綜

理內務皆并有條叙至其御童僕臨婢妾則又莊蒞慈畜閨闈
雍肅無間言者武莊公夫婦後先捐館正叔皆哭泣盡哀葬祭
之誠罔或缺焉先是撫寧年既壯尚未立子正叔為置媵妾以
廣其嗣及有就館者又曲為保育之君子至以小星擬其不妬
以樛木比其逮下信而徵矣嘉靖二十七年會撫寧以提督西
官廳始襲今爵每入朝及視營務正叔必夙夜以相其勤戊
申三月感弱疾迎醫勿效是夕猶欲其盡心王事以圖報稱語
之嗟乎以女婦垂沒而能語及公家雖古之鷄鳴之賢何以加
諸正叔生於弘治丙辰三月十一日卒則嘉靖己酉七月十五
日也得年僅五十有四云卒之後上諭之祭者二壇命工部

為造墳塋葬焉夫以正叔生於名家配乎名公榮被褒封並
得隆典詎非全福也耶撫寧以是年九月十七日引柩葬於紅
螺山祖塋之次乃以山東按察副憲蔡君需狀來乞志銘因僭
筆而綴以銘銘曰嗟嗟夫人全福無疆稽其生也族稱大方乃
其沒也榮及夜堂漢有曹姑周有齊姜比而論焉孰踵其芳垂
裕後昆視此銘章併告地靈厥永惟康

誥封左通政味泉宋公暨太恭人劉氏合葬墓志銘

嗚呼是為味泉公暨太恭人合葬之墓按刑部主事李君三畏
狀公諱宗姓宋氏世系履歷詳見雙巖樊公所撰銘志恭人姓
劉氏小字妙能世為山東鉅野人父珍好義輕財鄉稱長者母

李氏有賢德卒時恭人始六歲然幼而能慕至晝夜哭焉後事繼母高氏孝敬猶其母也遂大為父母所鍾愛恭人生而慧婉既歸宋門年甫一十又八是時味泉公祖父母俱在堂見恭人動循禮度克盡婦道為之喜動顏面咸謂新婦得人門戶之興可占也恭人事味泉公當業儒時勞動無間寒暑繼之紡績相隨至親佐燈火期以光諸勲名及味泉公以應貢入選授訓導河南從遊之士多就造者嘗進伯清至膝下曰兒努力讀書用顯祖宗老身明當無憂死且含笑矣伯清自是益篤志問學莫之敢懈乃正德丁卯果舉於鄉明年戊辰復登呂柟榜進士蓋至是族人鄉黨莫不仰恭人之善於教子而又羨味泉公之種

德於平生也正德六年以伯清中書貴勅封為孺人至十四年則又以晉階鴻臚少卿誥封為宜人嘉靖七年又以銀臺左通政貴誥封太恭人當是時味泉公已解任歸里則誥封奉直大夫鴻臚寺少卿再封中憲大夫通政司左通政矣逮伯清拜都察院右副都御史撫西川然聲望茂隆多所建白方將不次秉用以膺殊封未幾以勞悴遘疾卒於官自藩臬屬吏以至郡縣莫不悼之者皆自太恭人夫婦善教有以基之味泉公性素嚴大恭人雖顯貴然而敬事無違猶夫布韋結髮時也蓋六十年餘閨闈內政之外歲時家廟旦夕食飲罔弗精潔乃或賓朋往還至亦親理中饋靡不當封君意者嘗謂子婦曰爾

曹宜知勤儉勤則有功儉則可久蓋其天性之蘊發而為誨家之規多類此間嘗呼其仲子今兵馬指揮君曰爾兄為都御史不幸旅沒今諸孫郎俱漸成立爾繼爾兄亦讀書片泮柰何家食不之仕乎兵馬君遂如命於嘉靖壬寅入選銓部乃未授官而封君之訃至矣既免喪太恭人復語之曰爾忘爾父遺言耶其速仕無濡滯遂入選授南城兵馬司副指揮即迎太恭人養諸宦邸朝夕承顏備竭孝敬無何是年己酉春忽以疾作兵馬君迎醫多方以治乃秋七月若少痊既而以登榻仆地良乂未省醫來已無能為矣遂卒味臬公生於天順六年五月十八日卒則嘉靖二十一年四月十二日享年八十又一恭人生於天

順癸未四月初十日卒於嘉靖己酉九月十又二日享年八十又七云子男二長即滄伯清與予戊辰同年進士素相友善都察院右副都御史娶濟寧衛義民呂珙女 誥封恭人次沈貢士兵馬司副指揮娶濟寧州訓導李倫女 勅封孺人繼娶曲阜孔公瀾女 勅封孺人俱稱內助女一歸同邑庠生魏魯孫男七長民獻生員娶東平州侍郎劉東圃女俱先卒次民撫監生娶武城縣御史張某女次民敬生員娶監生高某女次民信生員娶濟寧都司馮某女次民悅生員娶汶上尚書王蒲菴女病卒繼娶濟寧監生胡某女次民化業儒娶教諭宗某女俱伯清出次民順尚幼兵馬君出女五長歸監生季芳次歸監生郭

墓志銘 卷之五 五九
時正次歸庠生王近道次歸鄆城尚書樊雙巖子官生士秀次
許聘監生李某子子瑄曾孫男三孫女四兵馬君卜某年某月
某日合葬恭人於邑之東北酒莊祖塋之次乃躬造泣請志銘
亦可以觀其孝矣因綴之以銘銘曰賢哉姑璋眉壽同芳顯膺
恩命光增震方鳳雛繼業嗣爾無疆地靈拱環保爾未央矧多
雲仍全福曷量有山其巍有水其長明矣善徵稽此無忘

明故操江都御史恒山張公墓志銘

公諱璿字仲齊別號恒山真定晉州人也先世有諱伯遠者居
郡城之北曰新庄生榮榮以紅巾盜起避地他出國朝平定乃
復歸業榮生信然俱弗仕信然生子男三季曰矩者是為恒山

之父云矩少為州從事晚年飭躬勵行尤崇義讓封文林郎浙
江道監察御史追贈大理寺丞丞妣苑氏雅稱內助封孺人加
贈宜人蓋生恒山公者也恒山兄弟二人長諱某仕至山西哥
嵐州知州恒山生而聰慧英發自為兒童時即有大志年十四
入郡庠刻勵數年一時並遊者皆推讓之他日戶曹李君夢陽
見其文遂大驚異 孝廟甲子果發解正德戊辰舉進士己巳
考侍御史第一再考實授復居第一臺卿屠公瀟每指所試獄
詞曰是固書生乃有老吏筆如此尋掌道事會邊帥馬澄乞討
蟒衣恒山上疏劾之風采動 朝宁未幾巡茶陝西會逆瑾煽
雲凡官秦地者必先納交其親識族屬恒山獨以有命有義一

切拒之莫敢以私干者時將官曹雄結姻於瑾佩征西大將軍
印厥子入京過陝城撫按潘臬多趨承者恒山獨不為禮雄子
銜之肆毀於瑾使人伺察者三卒無所得辛未復巡按山東是
時大盜劉六劉七劫掠諸省而山東為甚臺中被差者多假告
而去恒山則慨然請行至則檄下諸郡縣治城池練兵士嚴詰
察為守禦計巡歷所及則又問民疾苦去吏貪殘復請蠲賦稅
表揚忠烈由是東人為之語曰吾何幸得更生也先是巡撫都
御史張鳳任情害下恒山劾之宰執有欲庇之者恒山因再疏
其言動之非文移之謬宰執雖甚怒鳳竟罷去左轄姜洪廉正
人也不能諂事舊按陸姓者陸遂劾其年邁昏妄恒山力與白

之朝論爭傳其疏先是闡人谷大用督兵勦賊謾無成功恒山
疏陳三事一曰罷征未果二曰冗兵太多三曰事權不一蓋指
宦者為地方害也 上嘉納之尋 詔大用回無何賊出東萊

境上會僉事許君達牛君鸞及邊將劉暉許太輩會兵迎入恒
山為分命把截指授方畧賊始遁去遂劾各官怠緩縱弛者俱
蒙罰治賊平撫鎮以奏捷會恒山曰叅官吾職也至於奏捷即
諸公事吾或附名是借眾邀賞也遂不具奏職者以為知大體
後以公論有文綺白金之賜癸酉還京甲戌春值乾清宮災恒
山率同僚御史條陳八事還宮闈復司香早視朝御經筵掣邊
軍去番僧革皇店謹濫功言極剴切 上雖未納亦不之罪既

而復差南畿提學是時學政寬弛富室宦家子弟濫名庠校者甚衆及就試之多曳白者恒山於是嚴條約公勸懲革浮靡振篤實雖勢豪無復假借相老石公以為嚴毅公明陳天台以來鮮比司馬王公又以為雷電之震日月之明許之若乃蘇松人士則又以神明稱之乙亥轉大理右寺丞丙子尋丁母憂已卯免喪轉左寺丞嘉靖壬午總制侍郎臧公鳳疏薦大同巡撫不果旋轉右少卿贊佐大理後先五年叅駁枉縱卿長或少徧徇恒山即反復論辯必使歸於是而後已癸未轉右僉都御史巡撫寧夏首劾總兵大將之退怯者諸將三軍莫不凜然慶庶人台沈先倡賈鐸之變漏網幸免於誅流惡邊陲正德以來撫斯

地者莫敢誰何恒山至赴訴者盈庭乃憤然剪其枝葉漸及根株庶人始有懼意又以謀復讎衛奏下禮兵二部以賄賂將開端移文勘報恒山據法以聞事遂寢庶人憾之陰結官犯謀為中傷暮夜聞報罪人就擒恒山以其反狀奏上遣中官憲臣往勘庶人徧圖救援勘官利之勤為掩覆恒山與總鎮亦因有提解之命即獲庶人納賄私單目錄總鎮喜曰持此上聞助逆者當復何說恒山曰柰何為此敗蒲朝縉紳乎遂引火焚之比至京仰賴上明聖猶得以還原職及嬰變故後百念淡然遂上疏乞歸既歸日侍兄太守公田園觴咏若將終身西夏士人感恒山遏亂之功為建生祠舉祀肖像兩京臺諫諸君子皆

先後薦於 朝南科丘司諫九仞且特疏謂台沈之惡不減宸
豪恒山之功當不下王守仁然當國者受庶人賂若罔聞知公
論惜之已丑 詔求耆舊南北言官劉君世揚周君煦一時疏
上同薦乃起為都察院提督操江恒山乃振紀綱勤較閱嚴訪
緝明賞罰官吏畏威樂於因循者若以為過先是 上之建立
四郊也恒山協諸御史萬公鏜上疏忤 旨遂奪俸南禮部侍
郎黃綰恃寵貪污為御史張寅劾之黃即奏辨且自陳議禮功
並示其背刺盡忠報國四字以希感動 上心寅復劾其罔上
並行都察院勘焉尚書某謂黃背實有字非罔也恒山正色曰
原其刺字之意始欲求美官今欲幸免國法不能抑彼尚欲誣

正人乎尚書默然恒山得薄謫方相臣張孚敬觀政大理也建
議大禮張以書示恒山謂廷尉鄭公岳曰張言未可誣也自是
及秉用遂感恒山為知己且諷示欲遂顯用意恒山因善辭之
自後吏曹推山西巡撫北臺副僉大理卿河道侍郎凡屢疏俱
不果用張相既罷而李老時繼之嘗出送王太宰瓊文中有大
德大才大功之語恒山乃笑而弗言李殊有愧色及入相而貪
聲著恒山薄之因與絕交云給事中徐俊民黃侍郎鄉人也深
恨發黃之奸投隙乃劾恒山不能捕盜蠶捷軍官疏入李陰喜
其合已蓋自是恒山歸矣會長郎集今饒州府君以工部郎署
過家乃率諸孫捧觴膝下恒山及其兄州牧權甚且謂彼忌我

者將以去官為辱安知我天倫之樂如是耶由是釀酒栽花治田種圃日惟從事娛老又嘗自慰曰坐上客常滿尊中酒不空吾當不讓孔北海矣癸巳 詔復冠帶戊戌 詔復許致仕兩京部院大臣臺諫多連疏薦之者方擬起用乃辛丑冬十一月偶感風寒遂成喘嗽藥投罔效延至壬寅夏四月二十九日卒於正寢恒山生於成化丁酉正月三十日享年六十又六云惜哉恒山敦篤持正教家甚嚴接人有禮事父母克稱孝敬愛兄睦族母嘗下堂傷足恒山與邵宜人晝夜侍側憂形動止衣不解帶者凡三月餘當恒山茶巡西行瑾例公差不得過里恒山星夜馳省而母疾愈瑾亦卒莫察及亦天地神明默相之與入

仕三紀子孫儉素如寒士懸車十五六年未嘗一私謁公府是亦可以觀公之大較矣所著有家藏集東巡錄撫寧錄若干卷配邵氏封孺人進封宜人有內助之譽先恒山三年卒子男二長集癸未進士歷官饒州知府剛介有父風次臬郡庠生慧敏有才年二十九先其母兩月卒女二長歸任丘邊憲副子太學生倌俱邵出次許保定宋大叅子佃庶母李氏出孫男三長燭州學生集之子也次煖次燻臬之子也孫女五長歸真定呂憲副子縣學生承詔四在室乃今年巳酉使來問志仍復銘之銘曰偉哉儀範恒山之精粹乎論議易水之清夫惟守定是以見明夫惟積厚是以振英佳兒天錫薄海知名夙學天賦文苑飛

聲俛仰戊辰轡馬聯行上林看花風日和晴光景幾何存亡嬰
情堂堂宇宙赫赫風霆古三弗朽史有公評

明故大中大夫太僕寺卿沙溪孫公神道碑銘

公諱緒字誠甫沙溪其別號也世為東海人曾大父諱大公元
季避地來故城李子諱五者因占籍焉遂為故城人五生振富
而尚義鄉鄰賴之舉火嘗以歲荒焚券里中父老為相率立祠
焉後以公貴封吏部主事贈文選員外郎母蘇氏累封太宜人
成化甲午八月二日生公於鹿豕里第前一日寢後忽產異花
奇香襲人凡七日乃已公生而警穎異常五歲未能言嘗手書
一貴字文選公見之喜屢試弗爽八歲出就外傳能賦詩比年

十五六從同邑李侍御汝弼陵縣李解元大原遊十七入邑庠
復從靳文懿公受三易一時聲稱卓然同時髦俊皆以為弗及
也弘治戊午試中鄉試第二由是名動京師明年登己未進士
初廷試出讀卷諸老皆擬公為及第將進呈竟以忤時相
西涯遂唱名二甲第一授戶曹主事辛酉火篩入寇遣朝臣往
禦公被簡改本兵為參謀以行畫策售奇酌以權變總戎而下
咸改容禮之是時許襄毅公為戶侍每見公輒咨詢嘆賞事竣
調稽勲主事鈞陽馬太宰深器重之癸亥丁外艱先是文選公
病亟公欲終養再具疏弗獲請乃微行歸省於私第數日還京
將乞休而訃音至矣既免喪復除原官未幾轉員外郎考功文

選郎中時逆瑾嘗械繫某御史於市士夫莫敢申理者公過而惻然因詣瑾曲救得破械出浙江有褚知府者自知當免以在勢者為之地而懷金謁公公峻卻之卒不以其事白諸人及轉太僕少卿迎蘇太宜人宦邸歲暮大雪日晏而養具未備因婉辭以悅母心太宜人喜曰惟願終始不渝耳乙亥晉正卿時大司馬王公德華交結錢寧勢頗張移文僕寺語涉不遜公作書數之王引咎浙人胡逢者隸知印公見其少年雅秀教之讀書後舉乙酉鄉薦胡感知遇至以父事之舊例太僕供邊騾以千計歲久無用公上疏罷其役先是淮安鳳陽諸郡饑饉馬俱小弱公察其故咸與交兌省費至於萬緡民賴之不破產者千餘

家至過公之里有醜金設醮為祈福者南陵丞韓思義貪淺日著公庭杖之而按以法思義席權宦張雄凡與思義素者皆為之言雄亦托親信冠錦衣來致意皆不之答會思義以病死雄欲以故勘誣公而丁鳳劉愷於外助之乃繫御史臺閱月幸菴彭公力主邂逅律還職雄乃矯報禡為民 今上龍飛詔復太僕卿致仕家居足不及官府朝夕侍母愉愉如也母性嚴急或怒公長跪暑月揮汗如雨遇初度愀然塊坐終日蔬食曰吾念母氏劬勞也母沒後築漢陰亭剪韭軒於陂東柳曲自署陂東居士跡入城市者歲不二三間招朋舊看雲度壑賞花賦詩投壺對奕累日夜不倦揮斥萬累若將終身當道多所論薦其最

知者吳司空獻臣周都憲子庚王侍御應鵬也然秉鈞者謂其莫能偕時竟沮之公天性嗜學老而彌篤尤汲引後進及門之士必因才而淬礪之景州清河諸鄰邦率裹糧趨講今海內掇高科播令名多出陶鎔者庚辰避雨學宮見其屋壞因出私帑葺修之楊侍御師文紀其事邑志備焉先是孫氏同居者四世子姓既繁共謀析業公不得已取其劣下而便利者悉付諸弟姪幼受業於德州張君相不通問者二十年一日遇諸野停車伏拜張貧且乏嗣遂餼之終身鄉人劉美邵某白某窮迫委所生子於途而逃咸收育成立賴其不絕魏道茹後母毒幾不能生公授之田廬以養復諭其母感悟如初惟不喜作家人產業

耻士人計財與利每對賓客子弟談孜孜竟日皆出入典謨德者忘倦且自奉甚薄至賙人之急則又曾無吝色焉公生而美風神頎身玉立髯鬚望之如畫重交遊慎然諾與人語必倒衷曲至於嫉邪惡佞則又毫髮莫之假借雖古之豪賢何以加焉然至中年後慈惠益若可掬雖草木雉兔蟲魚之細罔不注意欲其生然喜音樂雖生平不飲若乃勸人飲則又弗之厭也為文響振漢魏雄視屈宋詩則冲淡含蓄浸浸乎逼大雅矣博及群書天文地理老佛醫卜莫不洞究若乃國家儀文典禮則又無俟論也所著有沙溪稿四十卷無用閑談十二卷彙求族譜大學中庸放言易經竒語陂東新論四書小說語孟毛詩尚書

雜義各若干卷藏於家遂奉公至評其作為近代宗匠允哉公
舊無恙嘉靖丁未十月十八日在別業聞女孫殤亟歸哭之已
就坐而逝是夕忽巨星隕於巽隅其光如炬空中有聲如雷其
異如此享年七十又四邑中遠近吊者奔走驚悼如有所遺再
從以下諸姪孫號慟躃踊有至嘔血者配仇氏處士王之女封
安人贈宜人先公卒無出側室韓氏劉氏張氏楊氏張亦先卒
子三人長若谷邑庠生張出次若緘癸卯舉於鄉韓出次若樗
邑庠生劉出皆聰明特達有父風女一楊出歸儒士楊磯孫男
女各三人尚幼若緘詣京師持公門人劉君志道狀請碑文於
予尚憶往年公以東田文集嘗托序焉既恨請益無由乃今聞

訃而又並識其子其真可感而慰也已矣因綴之銘銘曰茫茫
宇宙理氣乘之哲人挺生勲名在茲大河以北直節者難宦權
構禍蚤同掛冠三徑未蕪松菊有香天錫佳兒悉比珪璋多孫
林立福澤攸鍾鄉孚月旦足企高風

明故嘉議大夫都察院左副都御史東阜劉公神道碑銘

公諱大謨遠夫其字東阜其別號也河南儀封人高祖文整曾
祖海俱業農不仕祖澄陝西苑馬寺清平苑圍長父愷山西黎
城縣學教諭後以公貴封監察御史贈都察院右僉都御史母
扈氏封孺人贈恭人云公明亮豁如髫年入邑庠即淬礪志節
刻苦學問一時豪俊未之或先也提學副憲車君璽試其文大

加嘆賞弘治戊子以詩經薦於鄉北遊國學得盡友海內名儒如彰德崔公銑吾開王公綖皆其莫逆交也正德戊辰登進士二甲初授戶部廣西司主事督收黃花鎮古北口清江浦諸地糧芻是時逆瑾擅權扇震朝士凡行役往還皆趨候伏謁冀免禍者公 陛辭即出國門士論高之庚午改廣東道監察御史蓋自是風裁播中外矣辛未上疏勸學興政壬申巡按遼東陳三事皆有關政體時太監岑章肆毒遼陽公廉知即捕其左右用事者悉置之法章惶懼至誣讎以他事逮繫詔獄遼士民奔走泣送先後相望於道癸酉謫陝西隆德典史旋量移蒲城知縣既至蒲日惟行所當務蒲民頌德有碑在焉丁丑晉同知鳳

陽府會大水公以檄委賑濟多所全活戊寅晉浙江僉事首革菜戶於私衙既而分巡金衢時宸濠構變乃勒兵常山先聲四達兩浙賴以弗恐辛巳今上御宇入賀 萬壽晉陝西按察副使時總戎李隆者謀殺都御史許公銘事久未決當路以屬公竟正諸法輿論快之癸未晉四川左叅政分守川南川東二道值番夷為亂公督師征勦擒其元惡全蜀以寧事聞有銀幣之賜乙酉會四川鄉試充提調官作興之盛倍昔丙戌春懼母憂戊子免喪北上時三晉大饑公以才望素隆超拜都察院右僉都御史提督鴈門撫綏山右即上疏請出內帑溥賑 上可其奏遣官齎銀五萬入晉陽時方亢旱公巡歷所至問民疾苦兼

禱請旋復雨民大悅會有議撤備關官軍者公抗疏止之先是公之父黎城翁垂白在堂嘗乞終養不報既而糾劾叅議魏倫忤重臣意遂得致仕或勸公辯者公笑曰老父在里乃今得遂侍養吾又何求况暇辯哉既歸與黎城翁怡愉終日每風和日晴即約朋舊登高眺遠觴咏為樂若將終身焉者自己丑至己亥數年餘南北大臣臺諫及撫按多所論薦由是再起巡撫川中其宣布朝廷德意獎拔廉平洗刷垢弊凡地方事宜罔不經理精密至於臆臘逼邇北虜堡屯曠遠舊設指揮防禦公謂其未足以震懾之也具奏乞設守備施州地界川胡夷多肆行劫掠亦欲添設叅將疏入上俱允壬寅奉勅諭條理五事

以安邊禦虜又皆積有成效今川人固有能述之者公撫蜀凡四年澤被威宣銓部屢擬入佐院事並總督糧儲戶侍宮僚皆未之授蓋廟建以材木為急而川中固採辦地也由是欲又任公是時例當給由公父母暨妻皆荷封贈癸卯大木告完大司空奏薦公資望獨深勞績為最遂晉左副都御史仍撫川中兼賜銀幣公自是馳驅間關因感瘴厲遘疾冬十二月六日卒於官享年僅六十又八公生而天性剛方風度偉然處事不大聲色而又曲中肯綮家居時嘗以儀封壤地瀕河賦役繁重建議均糧修堤築堰有司行之邑民便焉有石紀其事配岳氏封孺人再封恭人有賢德子男四曰文曰象邑學生曰豸國子生

墓志銘 卷之五
曰其孫男五某某某某所著有東阜若干卷藏於家三蜀兩
遊稿已先梓行矣公之亡也臺臣上其功蒙 恩賜葬祭如制
四方聞而榮之蔭其子文為國子生盖有孝友之志伯仲愜於
鄉評焉文以予為乃翁同年且厚遂請為文用垂永久尚憶往
年備臬汴臺與公握手對榻懽好論舊乃今為公秉筆耶謹撮
其素行有裨風教者如右俾其子孫世守焉系之銘銘曰嗟哉
東阜才賦豪雄文宗漢魏誰則與京嗟哉東阜德音孔彰功宣
川蜀耿其流光嗟哉東阜允多後昆繼述方隆是曰恒存

明祁州知州封奉直大夫刑部員外郎天方張公德政碑

銘

庚戌之秋祁州進士王子用賢以其前守大方張公沒世而民
弗忘也乃述厥德政走書來問記予忝公年家因所樂聞也安
敢以不文辭按公姓張氏諱安甫字汝勉大方其別號也世居
崑山古婁之東郭東郭之人薰其德而仰止者素矣今之縉紳
和公宦情淡然雅有高致有以也 孝廟之庚戌舉進士二甲
拜官祁州既下車聞祁積習鬪爭俗日以漓乃教之禮義若曰
古風日遠化頑孔艱轉移振刷是誠在我也且躬為倡率之時
大盜蝟興勢甚洶洶復為擇選勇畧督率保甲遂立致渠魁旁
及數郡悉賴以安盖自是政平賦均俗變訟簡非復昔之祁矣
尤蚤夜惕勤無間寒暑吏抱文牘候者但占署而已先是祁之

人士推樸少文公導之講學日惟孜孜因扁郡齋曰洗心敦化
本也拔其秀而敏者若干人為鼓舞之由是始有登進士如郝
海者再閱歲政益宣茂當道部使論薦相望銓衡方議課最以
風示畿內而公母大夫人之訃至矣去之日父老攀戀塞道比
免喪無復仕用志公先業在橫塘蓋幽勝地也所居舊廬蕭然
出塵嘗鑿天方池優游自適以示終老有勸之出者但笑而謝
曰始吾為親而仕今復何求竟馳䟽引疾乞休得 俞旨晉階
四品服致仕日益揮斥萬累遠揖五柳葛巾野服申申如也凡
名山勝境良辰佳節輒復放舟命駕今尚可想其襟期夷曠若
將俯視六合焉識者以為東吳達人詎弗然乎昔嘗聞之欲知

其父先觀其子以石川之博雅清脩繼武甲科歷守三州既而
晉擢秋官榮登銀臺蒞官所至采著聲稱孰曰無自况兼諸孫
明秀器宇未量乃知積善餘慶不可誣也則夫祁之建祠樹石
既久而思雖謂公之緒餘亦奚過哉夫以公之入品行義度越
吳下從而階崇館閣輝煌斯世固其所也乃僅以令子得封秋
官卒焉謂曰位弗稱德非與嗟乎天之生人不盡所蘊則必昌
流其後理固然矣繼自今牧祁者其尚思齊於茲乎因綴之銘
銘曰賢哉耆德允矣循良古風振俗歷世弗忘飄然高潔蚤遂
翱翔才優守郡樂播天方有惠黔首無忝甘棠東吳擅名 魏
闕傳芳光昭汗簡曷其有疆吁嗟祁人真比桐鄉

明故南京通政司叅議筦湖楊公墓志銘

予自庚戌備員南部司徒越明年辛亥春三月淮陽同年楊公之子憶木持其先人行狀來乞志銘念一時榜中豪傑零落幾盡則又安忍辭按公名谷字遷喬筦湖其別號也世為淮之山陽人其先有諱十四者公之曾大父也娶湯氏生春以力農務本人稱長者春娶李氏生淋性純朴與物無競即生筦湖公者蓋其詳今淮安府志可考也居城南足不履墨市嘉靖改元時以筦湖公貴 勅封文林郎山東道監察御史娶董氏 勅封太孺人云子男二長曰銑拜官訓導娶鄭氏早卒次即筦湖筦湖生而聰明英邁性持重殊不與群兒類大父母倍鍾愛焉甫

七歲出就外傳所讀書輒領畧大義比及數齡日益有進由是操筆為文沛乎驚人矣一日郡守才公寬過其閭見而竒之因試之對其應如響他日月朔郡齋屢課屢稱才公謂所識曰異時縱壑昂霄魁天下士其在斯人與乃十又三歲遊泮水旋復入試棘闈甫二十又三遂領南畿鄉薦明年戊辰春果以三禮魁捷蓋士林翕翕然傳矣公既登進士三甲即欲求教官補外一日謁主司溫公仁和溫公因撫慰之且喟嘆曰豪傑之士如鯤鵬當凌駕九萬而豈燕雀知哉君勿以此介諸衷由是強之出為淞陽令淞陽浙之難治邑也公既下車興利革弊扶弱鋤強平均賦役作新學校未幾三年而邑政改觀矣會西江大盜

流劫及於浙省勢甚猖獗公因練兵振武至身先士卒區畫指
示不旬日而底定事聞 上有白金綵幣之賜比及考績撫按
兩臺交薦之甲戌遂登北臺御史補山東道理刑公夙夜憂勤
注意激揚堂考稱職改河南道是時天下多事公知無不言正
色立朝慨然有澄清天下之志先是巡視京倉風紀卓然已而
告病歸杜門却掃節經御史甯公欽都御史臧公鳳復繼薦之
乃辛巳秋仍起補山東道當是時 聖明臨御之初即條陳數
事如所謂勤延訪重親民明禮制云者中間援引辯論類多激
切一時朝論快之既而奉 勅巡視居庸諸關邊陲晏然軍民
莫不幸其來而恐其去也然公竟以其地隣京師甚邇因建議

添設兵備副使並一衛四所於紫荆易州諸處蓋以其平原曠
濶胡馬易犯有不得不然者公方籌度其事并有次第聞母氏
太夫人病乃又疏陳終養比至淮而母病益危公焚香泣禱於
天願以身代湯進俄頃而母即少痊蓋又三年而逝公哭泣之
哀顏色之戚凡有知覺者靡不為之感動丙戌春巡按御史李
公東薦之起補河南道公矢心率職猶夫厥初戊子之秋封君
偶病卧在榻公又乞歸是時巡撫唐公龍特疏以薦乃己丑春
南京通政右叅議之 命下矣公以封君八十又三勢不可離
膝下然重 上眷因捧檄登舟視事既三月仍具疏以聞而旋
兩京大夫士以其一舉而忠孝得焉稱羨有不約而同者自是

與兄柳溪朝夕承歡以求少竭昊天之報而封君訃且出矣方封君與公永訣謂之曰吾與汝母賴爾仰荷 恩錫封養生平足矣爾其竭力益効國家事可也公拜曰敢不奉訓公自筮仕家食先後膺薦凡一十有一蓋清風雅望庶幾有古名臣風云公嘗謂士當以忠孝為本比歸湖南泮渙池塘鷗鷺之間得以肆力問學汲引後學而公事之外曾不以一字片言輕入城府其賢於人遠哉公娶許氏 勅封孺人繼王氏俱貞淑內助居多子六人長曰淞先卒次即憶木生員卒業太學有父風娶都御史抑齋盧公女次憶公亦卒次憶淞府學生先聘御史少叅李公春山女繼娶謝氏次憶昆娶都御史熙臺潘公女次憶孟聘李氏皆業儒女二長歸太學生陸經次歸太學生朱深孫男三長思伯聘太學生葛房齡女次思元聘府學生郭子成女次思孝尚幼俱明秀孫女三長聘太學生陸允行子率禮次二女俱幼在室公生於成化乙巳正月初一日申時卒則嘉靖己酉四月初九日卯時享年僅六十有六憶木率其諸弟與孫將以今年辛亥七月初六日葬公於西郊祖塋之次嗟乎公偉人也積學而仕既仕而隱况道行於時樂教子姓澤及後進始終備矣若夫文學著述其緒餘爾復綴之銘銘曰吾聞天行至健也筮湖以龍德而自強吾見日月至明也筮湖以豹變而自章吾願河山如帶礪也筮湖以螽斯而自長

明故富平令靜齋王君配孺人張氏合葬墓志銘

南戶部新任李副郎懿述其姻親王子佩之母張孺人將合葬
夫君靜齋之墓懇予為志銘以傳且知靜齋予鄉同年家也義
不可辭據狀君諱宗源本潔其字靜齋其別號也世為吳橋人
考其家譜宋元來以武弁相廕襲至我國初 高皇帝龍飛淮
甸君之曾祖從善亦嘗業從文舉屢不果如志祖俊以監胄授
延津縣儒學訓導免喪後除補儀封歷臨淄學正焉父曰晟亦
以監胄授蘇州嘉定縣丞當是時君隨任受業蘇之邵先生與
趙君謚鄧君中和為友皆廣文同僚之子也君專心課業之外
曾無浪遊嬉笑同門重之未幾晟轉常熟令遂以制歸然讀禮

之暇即以詩書課君及其姪曰立者一同受學既而趙君謚解
發山東鄧君中和亦先領薦君至正德二年丁卯與其姪立俱
在中式之列識者至是莫不羨其同窓一時之盛也然君以戊
辰乙榜遂署山東安丘教諭君既蒞任因覃心職業念其邑庠
教範日弛乃躬行以為多士倡由是公堂日講立有恒規夜則
鳩令宿號未幾士風翕然奮發而捷科者出矣今副使劉君希
龍知府趙君昶鄉舉黃禎潘密辛樂皆其所造士也蓋自是撫
按兩臺聞而交薦遂擢陝西富平令矣先是富平俗頑民且健
訟君視篆甫旬日蒞之以誠信綏之以寬平鎮之以簡靜加之
慎而勤介而守凡所謂正俗救荒興學課士罔弗區畫焉由是

政聲煥然風動隣境而中丞李公宗樞亦以為邑令拔出君其一也君配張氏乃名族之女既歸王氏孝事翁姑甚至姑性頗嚴孺人曲盡婦道至於相夫以敬專撫卑幼以慈仁教諸子以勤苦則又聞諸黨里內外蓋終身未見疾言厲色可謂步采蘋之風踵雞鳴之芳矣子男四皆孺人出長曰瑞福建理問娶義民孫謙女次曰珙未仕娶郤淇長女次曰珮太學生娶寧津湯溪丞周堂女次曰瓛弱冠有美才早卒女二一歸邑人紀仁一歸邑人梁沂孫男二曰汝浚邑庠生娶太學生唐宥女曰汝銓聘同邑知州周尚志女孫女十長歸監生張從魯次歸邑庠生趙璧次歸庠生張之乾次歸監生周絃次歸庠生馬蓬餘俱幼

在室君生於成化丙戌十月十二日卒於正德丁丑十一月十七日享年五十又二孺人生於成化丙戌九月初三日卒則嘉靖辛亥正月十九日也享年凡八十又六云厥子珙珮將奉孺人柩合葬於靜齋之舊原詩所謂歸於其室者也復綴之銘銘曰始而同室陽之道其剛乎終而同穴陰之道其藏乎夫我志我銘非無據也爾之後昆尚無疆乎

明誥封太淑人王氏合葬揚州衛指揮使李公墓志銘


按淑人姓王氏贈刑部主事南菴君之女揚州衛指揮使逸菴公之配今南京錦衣衛都指揮僉事光榮之母也李氏世為揚州江都人始祖勝國初為大河衛百戶乃至永樂間高祖有諱

忠者以舍人功著靖難特賜揚州衛指揮使遂世襲焉忠生綱未幾早世贈昭勇將軍祖曰鑑實承襲昭勇者鑑生淮號素軒世其官如初配陳氏平江侯莊敏公女是生逸菴者逸菴名維禎字瑞卿光榮父也氣質清羸而天性淳朴兼嗜儒書擇配得太淑人內助良多夫婦相敬睦如賓比陳淑人沒素軒內範殊嚴太淑人則孝慈曲盡常行食飲四時祭奠賓朋饌會莫不豐潔由是咸以賢婦稱之逮正德丁卯素軒投老因速逸菴公北行繼職乃中途邁疾而還不復志於宦遊淑人躬侍湯藥曾不以旦夕或懈蓋其夙賦幽貞已見鍾愛於父母比歸李門則又極其戒慎且宜其妯娌云及素軒沒則又泣哭盡哀衰縞疏食

以終其身間嘗教其家之老弱若曰治生莫如勤養生莫如儉凡所謂家之俯仰婚嫁一切人事皆其綜理而調度之乃其自奉則澹如也至於族屬之貧困故舊之貸借乞丐之哀恤則又未之或遺焉乃其撫養光榮則又莫不周悉髫歲時節不令輕出里閭懼其放也常使二老嫗挾持之且曰是兒李氏宗祧攸係其謹視之無忽正德癸酉光榮甫長始以胄子例應襲職乃淑人又曰父病子少且千里遠行冒危涉險老拙慮當如何比襲職還遐邇賀者無虛日淑人則又獨有憂色人問其故則曰子之齡幼國之事重吾恐其未之能負荷也遂復戒而飭之嗟乎以淑人之篤於母教始終若是則夫一山君感慈訓衍家聲

宜其日就光明以臻隆盛自視衛揚州歷浙江都閩荐陞坐營
擢掌錦衣罔弗砥礪名行繼之公勤清慎以迄於今何莫而非
淑人誨教中來耶夫以王氏著姓淑人二兄某某咸登甲科今
考之惟一山母與刑部侍郎葉迂湖配並以賢稱謂非南國所
僅見也哉淑人生於成化戊戌十一月二十四日卒於嘉靖某
年某月某日享年凡七十又四子男一即光榮才兼文武名在
縉紳娶張氏繼娶喬氏揚州衛指揮喬仁女封淑人孫男二長
奎娶散官古源女次舉聘都指揮姜應熊女孫女四一歸刑部
主事郝成性一歸太學生火鏡一歸庠生王緒一歸太學生俞
松男其一山下某年某月某日合葬逸菴公於蜀岡茱萸灣之

陽乃踵予乞志銘焉因復銘之銘曰卓哉李氏秀鍾維揚業崇
武畧名滿遐方婉矣淑人德齊孟光鄉稱內助夙著慈良爰生
令子雄馳建康茂流家聲輝增夜堂有美後昆踵出翱翔世篤
忠貞視我銘章





原件短缺

卷6

